





書稿卷第十

周益文忠公集一百九十五



劄子七

錢師魏叅政 淳熙十年

某竊以梅雨未霽共惟判府大資叅政：化益新神天
贊相鈞候動止萬福更冀上體宸眷加厚保調以需廷
揚之命

某坐遠台躔每形夢想雖幸通音驛顧豈若日接茵憑
之為慰也通班規殿益兆登庸間寓賀誠於寸牘每愧
緒使不能敬修公禮豈期謙德過厚特枉盛儀佩服以
還慚忤斯甚尚惟鈞慈矜而恕之不勝幸願某日聞治

聲藹著京師蒙九里之潤私竊歎仰而每得來教常有
知足之言此固高懷度越一世顧穎川入相具存漢事
雲間洞天徒揭扁榜必欲徜徉其中猶當在三十年後
耳田生蒙不鄙棄之如其受賜渠只俟的報即走專介
敢乞鈞照

又 淳熙十二年

某比屢遣狀幸無遺墜茲枉誨答感慰無已庚暑正炎
共惟德業日隆居守餘暇鈞候動止萬福汾陽謗者紛
然恃叅政主張公道可以彈壓風波耳為將而廉勤撫
士又有志事功斯亦足矣而世俗方且責以軟熟結託

豈理也哉萬鈞藥石之言彼當服膺豈止聽信而已海
舟奏劄詳明上一、施行沿海巡檢恐擾而不能辦已
專委温台明三州兵器械之說毋惜繼陳幸甚梁承節
至末事俟其乞闕即與之尚未得來示也他委願效綿
力餘乞保輔粹和蚤還沙路

施聖與樞密 淳熙十年夏

某茲審夢記熊羆 均家國六月多雨已符崔草之占
竒行應太師之下幣儀不腆敬祝千齡尚惟鈞
慈俯賜容納其下情不勝愧悚之至

又 淳熙十六年春

某竊惟堯以是傳之舜亦以命禹古有是說今乃備
于聖朝共惟某官以碩德重望歷壽皇之二府為嗣聖
之端尹豈特與中外縉紳同此大慶固將趣頌召節平
章國政多賀多賀某尚冀修問先勤誨劄不勝感悚之
至

又 紹興元年

某竊以春王有傲寒色尚峭共惟宮使大資樞密怡神
大滌德望逾尊天人交衛鈞候動止萬福某屏迹故廬
得遂麋鹿之性餘波所及蒙潤矣邈焉候謁徒劇馳情
所冀仰承眷注保輔養寢調元之拜斯拱以俟

某去夏罷免本自三衢陸歸黃緣一望履舄踐升堂之
約無何幻穉觸熱病急挈舟過陽羨已而灾撓頰併
不覺留連三月中元後方為泝江計蓋不敢復道餘杭
耳差池晤語迄今惘然陸走川浮艱勤殊甚近冬方獲
定居向聞術者謂丙午人最畏己酉如王季海之厚德
錢師魏之強壯皆不能免有如庸懦不才叨踰特甚若
非顛頓狼狽則其死必矣詎敢不知幸也仰恃契愛因
筆及之

某自違鈞範日夕思仰每士大夫来自上饒必敬詢近
况具審神觀益清飲食快美雖不復引滿如平時而午

橋燕適不減唐賢暇時則繙閱經傳目力無異少年每切欽歎自惟名在罪籍方不為公論所與不敢輒以姓名污几格理所當然高明賜之澄察也幸矣乃蒙墜况緘翰未替曩眷盛德如此足厚風俗豈肯獨私情感激而已欲叙謝悃言莫能盡

留仲至丞相

淳熙十年

某竊以中夏暑雨共惟知府安撫制置龍學尚書鎮臨暇裕台候動止萬福比具賀緘復來况計猶未達茲領三月書翰益深感慰北方誠巨測招闕額軍兵去年十月即有旨揮自付出來奏即併修堡寨核糧草事降旨

劄下緣貼黃云：所以並作勘會然相去極遠非使司督責則未免悠：耳請受不等方此商議益事體稍重故不容造次亦不敢作兩司文字也貼支度牒更當與三省言之郵筒未果多幅惟乞為國保重以需登拜宋太丞與宗慶郭守一書急欲得達望便遣行至懇至懇

又 淳熙十年

某竊以仲夏炎熱共惟某官鎮撫全蜀神相名德台候動止萬福某近方以書入粉牌遞又枉誨筆益深感佩奏劄深歎遠慮已一：報去內有不可行出者稍從節畧其實皆元文也蠻獠誠無能為顧應之何如耳貼黃

及文州事殆蜀士傳聞之過彼初未嘗申哀鳴等語亦
不曾降旨揮依奏只是令隨宜斟酌施行秦黎州乞祠
已不允作過人逃入夷界自然百端鼓惑須用重賞募
人擒捕雖加誅戮何傷所謂移文瀘南語言不倫趙丞
相莫有以摧折之否大要多是吏人陰與交關若物色
得其主名懲一勸百乃伐謀之上策也度牒邊備已再
三為二相言之餘乞為國珍練以需大拜

又 淳熙十一年九月

某竊以秋氣澄爽共惟某官填臨餘暇台候動止萬福
比拜狀想無浮沉要衝城申請一施行虛恨雖就嘉

州受賜或疑包藏難測今黎州為備甚至若變為有備
無患乃策之上也梁憲想已至望與熟籌之大要在押
寨官以時支俸給乃可責其勿私役部曲使得一意扞
邊耳宗室歸正添差人與去年使司辟差不許先權旨
揮了無干涉今進狀陳訴者紛然上意本欲用金字牌
發下却恐張皇只入粉牌遙切望便施行四路漕司劄
子亦煩亟發下上再三丁寧徑自回奏尤佳公文中不
能達此意輒復具之夔路措置土丁欲省播川城官若
柳傑可用別示合入闕便當應付尋常使司所辟差遣
逐一督責所屬或有留滯切幸垂諭黔州蔣介所傳不

佳果否誰可代卑收耶黎州秦嵩今不復求去自詭
底績不知竟如何或別欲用人但同諸司具奏即稟
旨行下蓋姓復動是一時豈容含糊也折估文字雖
到而戶部議論迂泛三省旦夕取聖裁矣餘乞保重
以俟大用

又 淳熙十一年

某竊以歲宴凝寒共惟某官望重雲山百神所勞台候
動止萬福間數奉記不敢必其無浮湛亦辱誨讀感慰
無斁胡子遠已握蘭前書竟曾到彼否勾躍可謂公荐
上方倚用遽聞游岱極可嗟惜秦嵩舉職甚善採木不

為無因上不欲降旨揮以示沮但令尚書密加諷戒使
知恩德後望達此意諸司條具邊事奏尋即付出可行
者便合徑行惟作過則誅恐湏斟量輕重似難一切想
高明自有所處水落蟹若能存立亦中國之利來諭疑
其終亡不知今復如何王茶馬偶因舊屬妄有訾毀通
國皆不信之矣宗室并端正赴上曲折已為詳奏此亦
有遠來朝廷注授者此皆部昏並緣乞覓之過前此使
司乞給付身之人例是沮駁近一：施行稍碍格則為
取旨蓋萬里往復淹引時月安得不加意也春元審適
泰內何疑願趣曹裝以需大用

又 淳熙十二年

某竊以上眷名德併疇茂勳正學士之班為大用之兆
諒深懼慶屬者急遞拜書想無不達去夏所遣文書初
慮遺軼反成稽滯愧悚愧悚凡使司所請無不即行非
獨張敏也嗣有可委悉願聞之蠻夷曲折不一又漢人
有導之者諒胸中成算素定寬顧憂表弄止可附帶中
馬并奴兒結等數事並得旨依任輝亦如來教惟黎雅
再添土丁上恐異時錢米不繼却或欠闕姑欲練習見
在之數使之精銳則一可當二不然人數雖多適用却
少兼尚書延登之後他人不能樽節雜用應副不足反

成大患聖慮甚遠備載公劄尚有可議毋惜再陳若已
一面施行則望紐計收支細數更當奏稟也秦嵩欲去
甚急向舉劄師顏或謂施設不逮議論而王去惡雖有
戰勝之功後來幾至擾亦恐取輕軍民更須審詳下
諭上既已全蜀付尚書凡百固難遙度也蒙丹足都提
二人上以非首惡初欲遣歸既而復令如所奏分送利
閩軍中却望諭兩處令與安存庶幾餘衆歸心焉所荐
四士大契人望前此例召一二今徧有處分可卜倚信
倪教授蒙剡奏價重千金寸進有期矣

又 淳熙十二年

某竊以庚暑方炎共惟某官鎮臨底績台候動止萬福
五月七日拜狀入遞尋亦領福紙之况感荷止已虜主
曲赦上京即回涼淀傳聞秋末還燕內禪恐有此理大
石契丹傳聞難信金字牌既到必與吳帥子細商量也
田世雄易地未必樂又為范漕所按貶秩一等更望丁
寧毋蹈前轍大抵守邊以廉為本豈容放縱或是金州
賈之朝廷未嘗應付致令多方經畫黎非金比財賦却
須稍足更望時警策之袁弄分地可疑恐其合以謀亂
倍宜閑防劉師顏王去惡皆施行矣郵筒不暇詳悉惟
冀為國保重蚤登政路

又 淳熙十二年

某通中辱五月二十三日書翰甚慰企仰數日前曾用
粉字牌發一書未審無濡滯否群蠻畏威懷德坤維幸
甚田守亦有母年八十四別無兼侍方若辭此行會漕
司劾章至上令貶秩而夕即封還已從罷黜黎州又須
擇人有旨委兩司差擇勢不可緩王齡頃覺心氣微不
寧後來必無事向有兵亂一節姑留以張軍勢如何此
在裁處不敢遙度若已奏辟自可先令赴上也葛王四
月半赦上京之後復遷涼淀別無動作止是江浙閩廣
同以五月八日地震而太白頻年晝見自治之策曉夕

不皇安方用慶曆故事乞兩相同領西府庶幾名德福
量鎮壓中外坐以無事使疲駕者未底大戾因筆敢私
布之

又 紹興元年

某竊以王春有倣共惟大丞相調元餘暇天人咸慰鈞
候動止萬福輔佐之功冠絕古今去一小人多士誦歎
至形賦詠雖田野亦聞而知之垂諸簡冊厥功大矣更
祈善衛鼎鍊永弼昌運

某竭違誨席已歷三時渴仰在中雖造次顛沛未嘗忘
也姓名缺然於公府理所當然敢謂眷念有加墜况榮

問貳以上方之竒芬節室頓覺光輝感激非言可盡亟
此叙謝且不敢畧致芹獻仰惟高明必賜矜察

又 紹興三年

某竊以秋序已深天氣澄肅共惟某官額面正朝亮工
熙載天人擁佑鈞候動止萬福某仰資鴻庇粗安職守
比緣繆舉宜底大何敢謂開陳抵從薄罰其為慙感寧
有紀極不敢修啟恐勞損答更切愧惕賤息未能赴調
止望坑治司一幹官乃蒙陶冶倅貳名邦去家近便過
於自擇闕雖稍遠大例則然比之他處猶為近者私者
佩戴尺書莫盡萬一餘乞加衛鼎茵即正公師之位

某衰老且病久欲掛冠荷鈞播俾守湘中不敢固辭今
已期年自合引去緣絀爵方具表謝是以少緩念此邦
當湖廣走集之地而城圍鞠為榛莽人莫孰何自到遂
旋補治已有所費念非干懇朝廷支撥錢米決不能濟
輒錄奏劄拜呈并具狀申尚書省敢望鈞慈特賜矜允
若得度牒百道餘貼會子雖此間不可用然有合解淮
西總領所官錢可以兌換似為兩便所以乞委豐漕者
蓋某便為歸計而豐已知首尾且風力易於辦集免使
後人旋來經營鄙意如此伏惟融明洞照惻愍某無任
懇禱之至

又 紹熙四年十二月

某竊以嘉平紀月寒威凜然共惟某官股肱帝室師表
百僚神人翊贊鈞候動止萬福某自夏間一病危甚迄
今腹疾猶未痊愈中間嘗因請乞一再具稟劄聞主書
例却外路尺牘未知得徹鈞聽否茲望泰階懇為瞻迓
乃情依鄉豈易名言敢乞上體注意精調鼎食即正師
垣之拜

某茲審播告昕廷疇庸上宰榮升亞傅改昨大邦恩禮
駢蕃華夷鼓舞大丞相學臻聖域德冠民彝上符天心
下愜人望永毗聖主迄底丕平方且無官可辭是宜有

用益公集 書和卷卅 十
識同慶某以忽遽未能修啟以伸頌詠姑此布懽悰之
萬一尚祈鈞照

某老邁不才理合休致或恐事當有漸所以先伸祠請
竊聞五月間大丞相灼知誠心欲賜啟擬既而某疾嗽
大作不入食者半月入秋又得腹疾服藥雖多效驗轉
遲形容憔悴心志衰落見者莫不憐憫有識則又謂其
不知止也忽蒙恩詔移鎮豫章蓋君相未欲使之徒歸
姑以鄉部假寵此為榮感固不待言如其力不能任禮
當得謝若猶冒昧人謂斯何已一面具奏辭免徑還廬
陵恭俟允俞之命敢望始終洪造安全暮景即賜開陳

昇以祠祿少安孤跡免致人言尚有納祿一節猶煩再
造臨筆慚懼之至

又 慶元二年

某竊以歲晚天氣凝寒共惟某官游心靜密道腴日勝
天人交相鈞候動止萬福某年益老病益加最是心氣
乂虛兩耳常如風雨大至舊好與士人游今對語不辨
亦中輟矣丞相浩養素克留神內典日有所得其愧仰
固非一日何由瞻侍臨筆拳：所冀保輔養寢以俟歸
衮

某自聞鈞旆如湖湘道由臨江宜春間自合走介承訶

私居難辨專介又例與州郡相忘不欲借人亦謂今黃
守家此必便有急足往復不料久猶寂然遂成不敏鈞
慈知照有素諒亦未以是督過之耳即陽素號樂土二
千石又出甄陶仰惟高明簡重何適非安豈以外物動
其心哉夜永觀書之餘不妨袖手觀碁此消閒第一義
也偶善化宰是表弟借人附此徽劄二百番聊助著述
皇恐皇恐

某皇恐拜問隨府鈞聚緬想均介多祥諸位學士幾人
在侍傍聞令孫隨行就更俊爽公侯衮衮固應爾也有
委願聞一二

京仲遠尚書

淳熙十年

某竊以暑雨未解共惟運使察院按部雍容台候動止
萬福英猷與學宜在中朝羽儀多士持節雖寵未厭輿
議更冀遵令衛生別膺召寵

某茲承涓辰視印諒深懽愜長牋多幅禮意勤厚三復
不勝悚感屯田議已施行郭帥亦自畫旨措置若兩司
交舉競勸他日稍省糧運其利豈淺哉北方畢竟如何
衆謂葛王無恙則和好必不輕壞易世之後便湏動作
雖有此理然比來沿邊皆報增城修治道路豈恟疑虛
喝抑事或不可料也大軍所駐宜有謀報望不以虛實

周益公集 卷十
書和卷十
喙總領飛報此最急務也應城駐馬軍固便但胡虜為
寇率秋冬之交是時已水涸必無數渡之艱而目下移
屯恐州郡大有所費民力似難支吾更望與諸公深壽
之利果十則安敢憚小勞耶

某悚息拜問親幃想惟壽祉增茂眷聚均吉劉子澄通
判已歸否與羅守皆儒者或不及事千萬託存之漢陽
莊璋簽判吏事如何所居官窘匱異常望畧與假借為
幸有委敬俟來命

又 紹熙四年

某竊以秋暑正炎共惟判部尚書曳履中臺論思多助

台候動止萬福某二月間人回連辱賜教且拜十書新
惠皆欲之而未獲者其感荷何可言也尋聞暫過豫章
即趨聽謁便合具書且慶且謝而涉夏大病伏枕兩月
遂成因循平時素荷知愛必能諒其無他至於欲去未
能大宗伯相會可問而知也再晤悠邈瞻仰增勸所冀
厚輔寢羞即登政地

某比審對揚稱愜擢長秋官夫以德望歸然使蜀又底
成績稽叅前比便當大用尚迂塗徹蓋示詳試之意計
今已升二府屬病倦不能具公禮致懽悰台慈矜亮幸
甚

吳石二公抱負奇偉仕而不達邵公濟李知幾學問詞
采絕人皆賴尚書表而出之斯文有光焉自此搢進退
人才之權多士有賴矣聊預言之

某悚息拜問隨軒寶眷敬想長少均安路倅得眉闕想
過所望蕭宰闕不遠否因通問僭少有懇長沙大辟無
日無之三獄常繫數人今具事目敢望丹筆早賜斷下
造次知罪有委敬以為請

某蒙寵教詩詞清新嫵媚追配前修非特歎服才藻亦
以知大才異稟折衝餘暇乃為騷人之事業其視寒瘦
推敲者何翅九萬里也敬藏什襲永以為好

何道夫祕監

耕

淳熙十年

某竊以首夏清和共惟提舉侍讀祕監靜治雍容台候
動止萬福間濶不勝瞻仰昨復狀為開藩慶計已呈徹
繼弊政雖少勞然率下以正行其無事則亦無難便民數
事亦畧施行甚休甚休會晤悠邈萬：保畜以需環
召

某哀懦不才進不已內自修省無非可愧之時豈謂
高情念舊遠貽函教三復惟增慙赧莫知所以謝也惟
台慈加亮幸甚

林黃中少卿

淳熙十年

某竊以炎暑在辰共惟知府安撫寶文少卿辨嚴餘暇
台候動止萬福別久不勝思仰向者譚事紛：某適預
奉行而畏首畏尾畧不能為言者吐一言微聖主明見
萬里灼知忠忱則是非曲直未易辨也以是雖切仰德
而愧於通問茲承誨翰感忤交至未由會晤切幾順令
保愛嗣膺召節

某茲審三易詔除遂分閫寄事權加重委寄可知既璽
書趣行想不憚暑溽即遂引道舊聞湖南民力甚困後
後來養兵日衆頗費調護又兩漕置司所在督責財賦
頗急李壽翁不能支吾遂力告歸諸公若俱以國事為
念不至望風相疑則一道蒙福非淺計高明必有以處
此仰恃愛忘恐欲知其大畧輒私布之過目即藝此紙
為幸

又

某竊以天氣凝寒共惟某官鎮臨有裕台候動止萬福
間濶不勝瞻仰中朝宿望久勞於外士論太息諸公亦
有誦周南之滯者上以方藉分閫故少遲召節錫還會
有日切冀為國保耆副此馳頌

某自頃復狀之後久俟開藩茲聆洗印之期喜可知也
惟是長牋多幅貳以手書禮意勤渠豈所當得欲貶儀

為報力所不給故人諒其非簡必未督過然愧怍亦深矣繼此尚續拜狀

某蒙諭飛虎軍曲折仰數閱慮密劄數通皆降付三省矣長沙將兵元不少因董莘及劉樞各創一軍往舍彼就此若精加訓練自可不勝用而辛卿又竭一路民力為此舉欲自為功且有利心焉議者謂四項衣糧不
等恐非久長之策撥隸步司與御前江陵軍無大相遠也止是主帥不應回易科擾若非啟聞亦無由知己一面行下戒約自此亦少戢否親兵等必委翟瓊教閱比預令再任正欲留備驅策未審其才畧何如因風幸批

報以飛虎易鄂戍去冬嘗與侍從商量而王宣子謂此皆烏合無賴在帥府成隊伍方帖無事若使出戍無異虎兇出押遂姑置之更望審度見報也

又 淳熙十一年

某竊以秋氣澄爽共惟某官鎮臨有裕台候動止萬福開藩浸久譽問孚洽不勝歎服飛虎一軍牛僕屢乞移屯一切止之今又易帥矣韓生臨事如何不哀歛否物色垂諭恐其驕矜自大耳進書給札可謂有卻轂之風甚盛甚盛願諒已轉官渠自乞遠闕計議亦已與之呂澄既差見闕指使又為別白前事王音宣諭云小過可

周益公集 卷之十一
恕特與除落仍遷一秩所謂大哉王言也餘莫以時珍
愛即俟嚴召

某衰老不才素無榮望故人所知今乃冒處非據夙夜
悚懼長牋多幅遠紆盛禮尤切皇恐既不能視儀為報
惟有手書可贖簡率之罪耳皇恐皇恐虜主已到上京
奉使驛程皆報來自授禮無疑其儲在燕而守汴者愛
壻也靜待固上策但聞素欲傳授易世之後擾：萬緒
自此始庸懦豈足以叅帷幄念之凜然恃契照敢布一
二
某悚息上問慶門眷聚緬想翁受多祉有委勿外汀劍

間頑民七月間因蚤禾旱損起而為盜尚未殄滅恐欲
知者吳宰未替否實與親且舊因白事望再三諭以丁
寧公此之意使之無怨甚幸

又 淳熙十二年

某比辱誨翰不勝慰感春秋集解荐拜珍况欣幸無已
移山口寨已如諸司所議寢其事有疑必詢不可則止
此乃朝廷常體初無固必况議者乎但黃沙代戍監司
中亦有未以為然者必欲鄂軍如故竟何如也荆襄乞
飛黃不已若歲令一半往來江陵既使習知大軍紀律
又有以繫懷土之心亦可行否望速垂教韓生之子

令特補兩資文字想已到他遲後訊

又 淳熙十二年

某竊以秋煒澄爽共惟某官寵渥方新神人欣相台候
動止勝常才猷德望宜還本朝久矣上以湖湘重寄徒
得君重晉職因任益非復也勉狗借留行膺嚴召飛虎
增給見今商量家累重大共約幾何民力困極不得不
惜財賦非敢如往時密院增兵而弗計大農之盈虛也
重役人其間亦瀆有不堪充數者莫稍加分別申來否
衣糧復取之本州惟復併就總所前未暇區處恐當會
計不然版曹定紛爭或貽患諸郡爾斛斗既取米便可

較量減否方知曲折衆謂古人用字極簡非如後世動
輒避忌故治亂謂之亂治荒謂之荒亂臣十人遂荒大
東是也易云減否詩云何用不減未易槩舉以為減私
却自漢以來方用之耳安撫使不巡按而不知郡守則
臺諫在朝廷遂不彈監司守臣乎蓋亦詢謀於可信之
人思過半矣不然雖覲面覽訴訟何能知其底蘊素荷
知灼且蒙諭及輒爾觸突皇恐之至餘乞保重

又 淳熙十二年

某辱十月所惠書尉劉君謹在念但渠投匭詆蜀士而
於張續尤甚却似少思所謂以母言以妻言固自不同

耳巡邊甚善然帥臣一動繫人耳目不若及時徑具減
否狀之為安縱不深知畧舉其凡何害蓋升黜須參考
衆論耳當時立法正謂帥兼州若不委以同察則部使
者必相輕重或失事體非專責茲事也上於少卿可謂
委曲矣倘堅執不已何以仰副禮遇望深思鄙言毋使
立法美意反成惡意不然此非密院職事何用曉：也
高明辱垂亮否他續馳布

胡子遠即中

淳熙十年

某竊以中冬凝寒共惟大孝提刑郎中端憂有相啟處
交裕某久違友誼瞻仰不忘才元君玉次第起鎮交遊

不落莫否名望之懿諸公日：相念誦指絳琴當膺擢
序某衰病侵凌歸田念切後會殊未敢必臨風悵然因
府介回附此見意甲辰小春茶十銖謾往不多致者以
到彼則已陳矣餘乞節哀自重

劉祕書

光祖

淳熙十年

某比承先府君奄棄榮養祕書天性純孝哀慕骨立念
欲遣簡相慰勉而某自得伯氏之訃痛割無以為懷抱
病兩旬至今猶未全安雖間託朝士轉致區：而寸誠
莫能自達愧企千萬竊惟門戶重寄扶護方艱不宜過
自摧傷以違中制無由往乎但極惻愴謹布叙萬一續

別遣記

又紹熙四年十一月

某竊以霜日清美共惟某官鎮臨有裕台候萬福某自
 已酉夏舟中蒙訪別之後相望悠邈無從通問茲審易
 鎮夔子念欲走介致區區而經歲卧疴日事藥裹且每
 為去計遂成因循亦料彼此心照不在尺書其如愧企
 則勞甚矣繼趙子固之後凡事必省力馮漕賢德有餘
 氣味相同尤可喜者某年將七十身又抱病一歸之外
 它無足言祠請雖未允已懇諸公再為開陳度湏諧矣
 歸伏山林愈難寄報偶虞雲安介來因託附此其人自

意振起家毅今時作縣不易當有以大莸之勸怠亦未
 能專作漕書也温叔子遠相繼薨謝殊可嗟惜治部聞
 今歲豐稔他路如何餘祈為時珍嗇即膺嚴召

楊祕書輔 淳熙十年

某竊以天氣清和共惟知府祕書台候萬福開藩暮歲
 以學道愛人之心而臨儒雅之俗豈勞施為自應廓
 無事惟財賦殫竭所在昏然自非執事儉以足用明又
 能窒滲漏之原則民力何由少蘇此所以竊為眉山賀
 也萬里相望會晤悠邈臨風增情愿言善護寢羞以需
 召節

其哀懦不才誤蒙上恩躡寘西府瘵官之惧夙夜慄
雙書為慶雖佩故人相予之厚愧非所稱也別紙諭及
黎州去夏曲折甚荷不鄙後來得諸司書云因增戍遂
帖：未審竟如何因風更望垂警餘非尺牘能盡一味
馳仰而已

某借易上問慶門眷集緬想上下均祉文潛時相會否
一書告差人送達有委切幸垂諭

湖北吳提刑

燠

淳熙十年

某竊以天氣鬱蒸共惟提刑判院綉斧尊崇台候萬福
某尸素久宜汰免比復聞伯氏之訃痛割殆不能堪益

動歸興矣它無足言會晤悠邈萬：保畜以需召拜
某特辱書翰知以季春寒惟四六叙述前事所謂筆端
有口歎服無已溪蠻本無能為非生事者導之使來則
政謬者人不得其平乃至擾：塞路極可笑而差官煩
擾為甚比亟罷之惟土丁一節本欲因其保護鄉井可
省支費却乃許以禁軍衣糧而不涇額無階級如此則
萬人可以立辦况二百乎今遂不能出手而王守又欲
撥錢助他日犒賞邊氓其如民力何此正未知所以處
也祝汝玉移武岡必甚愜意漢陽僉判莊章與之有葭
莩其人無過舉否因風一諭

又 淳熙十年

某近已復狀茲得王沅州書其便民事頗及備邊謂如
 保伍一項深恐驚動邊民非徒無益兼置保正副之類
 將來守令必有科擾貽害無窮既是曾結甲置總轄莫
 若因而措置申飭使成紀律免致作備為善麻陽移戍
 之類併望同共蚤與從長相度回報不欲委帥漕恐往
 復費月日耳某曉夜念歸但思古人一日必葺之誼不
 敢苟目前志遠慮也辦治吏固可喜然不失之刻則安
 作生事班策平：守邊誠不可忽台意以為如何陳帥
 已易地果病否

汪即中

義端

淳熙十年

某竊以天氣炎熱共惟知府即中靜治多暇台候萬福
 疊勤誨翰不勝感慰吳即為林文軍所獲其功甚偉十
 一日明州已鬻於市其餘俟案到次第施行荻蘆遁歸
 之舟緣數日假故未見使州公文當一：如所戒張提
 刑既改差必不暇修怨易地之諭當為諸公言之黥卒
 充斥諸郡皆以為言勢須稍有更張而朝廷例下刑寺
 刑寺第以見行條法為解大抵便文自營深以為慮也
 未由會晤切幾以時珍愛佇俟褒璽

又 淳熙十年

某竊以天氣炎熱共惟某官台候動止萬福易地事上台甚留意七八月間須將上矣水寨已降旨揮姑以二百人為額衣糧並如舊不必明言增減也後有闕則隨元寨收補庶可悠久惟都監不應出城自可別擇人雖添差不釐務有可用亦無妨併冀台照病勸具記草率餘惟珍愛以俟新渥

又

某竊以天氣暄和共惟某官台候萬福特辱書誨不勝至感水寨曲折此難遙度望反復與邦人之賢者再三商確然後叅以辨吏智士而博謀之以公牘見諭當折

衷行下然詳觀來示思過半矣陳廣小人全在駕御如何前政任用過當自應妄作當如所諭呼來以己意鑄晚之所投兩牒一自辨說一乞賣大舟至於藏甲恐礙刑名必難自陳今備其詞劄下渠若得要領却保明申來決不令歸故官也旦夕自携去餘冀保愛以需召節君舉數字告差人送去子宜曾相見否

又 淳熙十年

某竊以天氣清和共惟某官鎮臨暇裕台候動止萬福連辱書誨偶卧病不能即具報但深愧企自劾之章已嘗進呈有旨只用乞祠文字降不允指揮二相亦常以

易地為言聖慮高明終恐小人謂因其紛：移二千石於體非便切望深體此意治事如常鎮之以靜勿為浮論所窺乃善三數月後徐圖之似未晚也催錢恐緣版曹及拘催所等處謂使州錢流地上又經總制驟及八分故爾督促提刑司既被上司符移行得必峻諒亦無他其餘郡事不妨酌中而行何畏之有水寨事見熟議孟享後當取旨鄭龍圖宅曲荷軫念尊夫人壽履康寧唐曹成王事深可為法况初不至是耶陳國錄一書告送似餘冀保愛以需召節

又淳熙十三年

某蒙諭施先等已令帥司押下此事本非執事任內拖欠既來進狀不敢不行蓋小人窮則無所不為異時或作過議者必謂密院無軍政如向來婺吉小擾至今云云未已殊不知激之使陷於罪雖太公穰苴亦無所措手矣高明當悉此意治之似不必峻也政譽已彰上知之要路亦知之自此當無掣肘以需報政且佇明陟不勝跂望

書稿卷第十 終

Blank columns for text on the right page.

書稿卷第十一

周益文忠公集一百九十六

劄子八

蔡定夫少卿

淳熙十年

某竊以秋氣澄爽共惟總領少卿宣勞王事台候萬福
舉將大契公論閭侯驟用良由薦詞獨異之力也敷脚
米以給貧乏之軍可謂惠而不費運粟實塞雖許支萬
五十緡而不云椿管錢內支廣西十萬緡竟仍一時之
例在少卿固有搏節斡旋之妙只恐他日魯不贖人耳
因來諭乃及之餘冀以時保愛亟膺召節
某衰懦不才誤蒙恩擢方此兢惧長牋多幅過勤盛禮

用益必集 書和卷卅
雖佩故人敦舊之意如弗稱何亟此具謝不果詳謹尚
惟矜亮幸甚

某僭易拜問太夫人壽祉增隆寶眷均吉春榜補試華
宗鼎盛多賀多賀有委願聞之

又 淳熙十一年

某比已具記叙謝茲勤近誨感戢無已廣西十萬緡豈
容歲補中書有二猾胥專以刻削四方為理財之術凡
戶部勘當皆其意指也前嘗語丞相自此相怨入骨可
恠可恠陳漕何遲：如此趙倉喜讀書有志澄清當稍
振風采京西病勢如何別乘之諭謹悉閣副帥已到否
鈞鑒放罷宜與郭帥商量羈縻之武昌其狀貌有反相
未必不北走也

又 淳熙十三年

某竊以暑令正炎共惟某官珍台容與台候動止萬福
特枉誨存不勝感慰上養素厚晉職已有成命烏容過
也別希所諭晚夕在念江陵城坡聞寄居獻疑於沂公
天下事誠未易為直便會子屢於榻前極陳其故然非
主計者協力豈能盡革大要是堂吏貪賞多給茶引為
總所之害比雖委趙戶部理會恐不能濟奈何廣西鹽
法某益以此得罪諸公今無緣干預然目前朝廷竭力

應副尚可主張一二年後百孔千瘡矣蜀中曲折敬悉
五月八日江浙閩廣同日地震毗陵如何憂懼殆欲頭
破也忽：不盡所懷所幾保愛以俟召節

林子方祕書

淳熙十一年

某竊以天氣凝寒共惟運使祕書年兄使事餘閒台候
動止萬福某叨塵過分日益兢慚自葛王遷都知擾
萬緒當自此始蓋彼之興衰在我非所深慮而將帥乏
人歲事多歎兵民匱乏自治未盡猥以庸駑尸此重任
以是寢食俱不皇安缺焉馳問良以是耳徐君所附狀
亦不記道何語也茲辱墜教感悚何已願吉之早可憂

昨具以告諸公雖撥萬石未必濟用蠲放三斗已下租
數不多而利博三省例下戶部勘當更當贊其將上勸
諭納粟前以虛偽衆論難之今若申請不用賑糴止令
賑濟先差官交收自行支俵庶革偽冒此一項亦曾奏
乞否願非吉比尤當經意也偶病眼具狀草率惟乞以
時珍愛佇膺召節

湖南潘帥

時

淳熙十年

某竊以天氣澄肅共惟提刑大中褰帷有俶台候動止
萬福比遣狀必無浮湛六月間嘗辱諭及湖北水旱方
賴拊存復移澄清之惠於湘中兩道民皆貧悴力行所

學以寬頽憂初無間於南北也澧守不謂狼籍如此核實來上必不止鐫秩而已未由會晤切幾順時珍愛以需召節

某悚息上問隨軒寶眷緬想均介休祥使臣陳彥忠頗愿謹因其行附狀謝前况草率為愧近嘗行下黃州遣戎事如以都巡代鄂兵似可行但恐人數太少耳若移批請所費添百十人猶為減省望蚤與回報大要柳桂永道財用多白撰官吏全無俸錢此甚可慮向時李壽翁申明出豁一路收支已得旨先理會窮陋數郡朝廷亦易應副而芮國瑞攝夕郎駸壞指揮至今使人太息

也

又

淳熙十二年

某竊以庚暑正炎共惟知府經畧直閣印組方新台候萬福辱五月書翰不勝慰感嶺表得吳隱之孔君嚴遠民有所恃而憂頽可以坐寬非獨為執事賀也五月八日江浙閩廣同日地震未審湖南北如何茲非小異夙夜憂懼消彌一道之患於未形是煩一行然湘中失助多矣邵陽之旱雖倚漕司通融更望丁寧蘇漕為佳一案推結乃後來法寺謬舉每為諸公言之今吳卿亦謂非是也舊法為新進以意增減殆盡初未嘗推原本末

惟視獻議之人力何如耳某頃備丞轄二年有半遇有更改輒持之不下殆為是也正遠良晤切幾順令珍齎嗣膺召拜

又淳熙十二年

某比審簡在淵秉升延閣而帥一道士大夫至相慶于朝遠方吏民喜可知也兩承誨劄備認眷與番禺去朝廷數千里文法素濶畧今歲又有星隕地震之祥正籍威望消患未形幸歲稍稔所益多矣摧鋒大奚利害尤多有可垂警者傾耳以俟比既禁軍中回易科歛則修葺軍器之類須賴使司及漕臺應副不然又將闕事上

令降指揮諄必已見之他續馳布敢幸垂察

又淳熙十二年

某比已具記茲辱十二月誨翰喜承台候動止萬福號令一新甚副眷倚遷秩何必辭避耶令似新除諒惟惟慶陳章忠義如此上既官其子又補訓練官仍厚賜其家足以為來者之勸矣摧鋒曲折其來已遠望與漕司商量經久之計或有所請自當取旨施行奏狀若乞降付三省密院庶可預聞不然省中徑行此無緣知也蒲羅叫已有旨釋放誅戮巨猾亦降無罪可待指揮矣某偶連日大病值赦逋勉強作此庶幾速達幸恕草率之

罪

又

某辱誨翰知以九月四日交帥事續別馳慶飛虎軍內
外議論交興皆欲移寘江陵正慮湖湘闕人彈壓奏乞
仍舊亦有以書問相侵者不敢校也孤蹤若不在此眾
說必紛然矣因來諭輒及之二廣事宜毋惜諄誨大抵
消患未萌近世所忽况遠方尤當早正素治非執事固
不敢及此也

又 淳熙十四年

某十一月誨翰不勝感慰克喪悲纏率土况在臣鄰日

瞻舜孝殆無以為生也常平米已令提舉司審度施行
惟借三萬放五萬例經有司然長沙非他處比亦易那
融若俟報却恐後時耳滕宰既請祠而去宜章須速行
選避吳宰久欲歸兼人情已闌百事必費力切望留念
劉衡州必須少安授代亦非遠矣偶感風頭痛值便介
占叙草、切幸台照

廣東韓提舉 壁 淳熙十年

某竊以天氣凝寒共惟 舉判院寨惟有做台候動止
萬福名望之美簡上知字人望舊矣就畀使節足行所
學長賤多幅過紆盛禮三復愧感奏論西益辭達理盡

今事已成無中輟之理但當就其中相與孰復之計已
 與胡漕會議毋固毋我聖人事業諸賢自優為之夫何
 慮焉葉子非不幸乃爾其家將奈何已宛轉懇西路二
 司但恐改法之初州郡事力未易辦執事以交承之故
 亦須助其端想舟行亦過東路耳餘冀以時保耆別需
 召拜

某僭易上問台閣眷集緬惟上下均祉餘干得近書否
 子直頗以閩中地熟為言其政則甚美也有委勿外

湯臨江

思謙

淳熙十年

某竊以天氣清和共惟知郡朝議尊兄台候動止萬福

特辱誨翰不勝感慰賢德治郡所謂民之父母但賦狹
 用廣又劉守失於不思頗遺患於後遂勞區處下諭謹
 悉第恐增撥必下版曹漕司未能遽如人意爾適得廬
 陵伯兄父子淪謝之報老懷哀苦在告累日旦夕當為
 諸公言之思不及親染所幾以時保衛顯俟召節

勾崇慶

躍

淳熙九年

某竊以天氣清和共惟知府朝議鎮臨暇裕台候萬福
 典藩連上課最制帥於臧否中荐進頗力諸公亦深知
 治行獎擢只在旦夕更幾保耆以對殊渥

某特枉誨存深佩眷誼先給事外制幼年竊窺一二於

却報中至今成誦不敢忘幸得拜觀全集何翅拱寶之
獲也伯父既預黔南交承後與林正除漕廣東訓詞實
出大手今第一卷第二十二版中備載但伯父下一字
諱見而非民也望諭匠者改正幸甚
某拜問台閣寶眷欽想上下均祉藥物墨畫遠荷垂况
茅叨塵禁省例辭親舊之覬雖託契不敢獨受切幸情
察有委勿外某再拜

姚倅 穎 淳熙十年

某竊以臘寒甚勁共惟通判秘書狀元台候萬福輔藩
事任繁劇異時佐理者鮮肯留意吏事哦松養資考而

已狀元以邁往之資超世之文薄蓬萊而遊茂苑正使
拄頰看山號方外司馬人亦孰以為過願乃勤勞王事
孜孜民隱雖米鹽細碎簿書期會皆不憚煩為之復以
餘日屈首受書益廣多聞其賢於人遠矣蓄之愈厚其
發也愈大摩九霄撫四海孰能禦之更冀為時自厚以
需嚴召

某悚息再拜某哀懦不才叨塵政路久慚非據忽蒙上
恩獎擢使預聞兵柄量才揣分尤非所安曲荷敦篤墜
况緘啟由先漢以推本三代其為議論有前輩名公未
嘗及者至於思古念今意遠而辭不迫何執事富於學

而工於文也寸心不足容感刻篋衍不足藏珍投惟當
誇詡於百僚間以毋負施况區：空言豈能道謝惟恕
察幸甚

史江陰 淵

某竊以天氣暄和共惟知郡監簿撫字餘間台候萬福
特勤誨翰深佩眷予兩蒙諭及蓋寨屋三千緡屢劄漕
司通融應副乃云竹木輒灰數已浩瀚此項合是使軍
出備雖已再行下然州郡難與監司力爭更作書與兩
漕商議早以畢工間為佳和糴水脚錢三省已施行大
例皆是分認併幾垂照餘冀保愛倚需褒陟

合州何僉判 預

某竊以天氣暄和緬惟朝請尊候多福昨辱書翰常
報章茲枉嗣音益佩眷誼且以其備數西府遠形長牋
辭美而意勤三復不勝感懌淹回有年出峽又甚勞費
近吏部頗發倅闕下轉運司左右資歷自應平入亦可
俯就否某前此未能誦周南之滯又今職所不及徒增
愧耳餘冀保調以需識擢

劉廬倅 煒 淳熙十年

某辱書喜承佐理餘間百順來備北峽閔漕司既欲損
其費州郡又復觀望安得不減裂今已再降指揮宜懇

張帥速差十數人同語練將佐往料理左右更一臨之
不必約守倅徒成張皇若閔隘粗備戎兵續議未晚江
州在池鄂之間邊面甚濶兵行詭道初無閑劇也冷水
嶺州郡豈肯承當兼亦識慮未必及此須與張帥謀之
萬一賊兵繞出巢縣之後豈無腹背憂耶河堰二事郭
帥亦曾說及但工役浩大利害難必所以未敢造次更
當熟思之孤蹤獨肩重任畧無助我者顛沛不敢辭只
恐誤國爾餘冀保愛

或謂六安山地形險固延袤數百里若無事密葺非但
緩急駐兵聚民亦可內為廬州援助如此猶當向前

今只議保北峽冷水之類規模大狹更望稟帥相度
申來益上亦嘗諭及切幸留意其再拜

葉舒州

大廡

淳熙十年

某竊以秋氣澄爽共惟知府大社治民底績台候萬福
冷水閔事帥司方報到深不以為然又恐無為軍憚於
興作故不肯承當既帥司屬官同行不應扶同旦夕備
坐行下更望條陳回報北陝一面修葺甚善此在境內
他時欲任責須早為之所用過錢米望別具的確數目
垂示官司作事苟簡近來尤甚正恃通明力革此弊餘
冀若時保愛以需召節

李萬州

唐年

淳熙九年

某竊以抄秋氣肅共惟撫綏雅俗台候萬福孝友之行
著于西州選除為州實召用之漸過勤緘啟良佩謙施
未由賂語切幾順時保愛

某承以季春視印敷上德於千里想見吏民初被美化
謠頌藹然前守何苦急於功利括田害人所得米麥終
二百餘石而使千里皇：是誠何心哉已力為三省諸
公言之矣兩邑無正官事何由理近王侍郎奏請不拘
常制許外臺舉辟莫有人肯就否要之須有俸錢乃可
養廉此先務也

劉衡倅

符

淳熙十年

某特辱書翰喜承辦嚴餘暇履况集福榮赴非特少展
才業惠此千里而廩祿及親其榮多矣商畧晉史體正
辭順欽歎無已兩漢三國既已成編今復發明典午之
始終則南北史隋唐五代必將次第撰述他日願預拭
目焉忽：姑此為謝餘冀若時珍愛以對褒擢

劉濠州

楊廷

淳熙十年

某竊以秋暑熾炎共惟知府朝議印組方新台候動止
萬福戶口既耗則耕殖必資游手生聚未至則軍士去
來不常平居可耳緩急扞蔽將如之何今聖上遴選良

周益公集 書和卷之十一
守必為經遠之謀以寬憂顧願言善護寢饋別需褒
璽

某特辱書翰喜聞消息洗印長牋詞采清新三復欽歎
向所示佳篇至今藏之篋笥也邊頭恐有所聞毋惜時
以幅紙垂報近漕司劾含山巢縣透漏銅錢指揮必已
徧行又無賴之人過淮行劫盜馬之類前此多失措畫
繼今一切無慮矣幸甚

某悚息上問庭闈緬想榮養方隆壽祺增永眷聚均
吉有委切幸垂戒葉丞相止於此殊可惜也某悚息
再拜

王守鎮

某竊以秋氣漸涼共惟知郡朝議台候萬福辱季夏所
惠書不勝慰感保伍固當團結茅客主戶雜處驟然編
排恐蠻獠未動而平民先被其擾况既立大小保副則
將來州郡必有差役科需今時守令豈人々如執事簡
靜愛人者乎所以逐一降旨行下同吳提刑相度葢結
甲總轄苟不為文具則自足外禦內守切望審圖經久
之策麻陽移戍須待提刑司報大觀專法便得之幸甚
餘冀善愛以對褒陟

郭崇慶 明復 淳熙十年

某竊以天氣凝寒共惟知府宗丞填臨暇裕台候萬福
邁往之姿博古之學翱翔班級垂上要津擁麾而去土
思固釋矣士論則深惜捨王國而重侯藩其望來歸者
槐也也更幾保蓄迄攄素蘊

某自別不勝思企知用七月未眠篆名邦樂土密邇鄉
社可以忘萬里遡流之艱險矣長牋多幅疊紆盛禮欣
感無喻邊事帖妥諸郡皆可少寬年豐事簡不妨著述
否安得請教如前日但時披漢事讀詩編以當會面而
不知相望之為遠也

陳江陵

孺

淳熙十年

某竊以天氣漸熱共惟知府安撫顯謨郎中填臨暇裕
台候動止萬福某特辱誨存不勝感慰資序未正已為
丞相言之矣襄陽雖近邊而荊州尤為要地郭帥乞更
戍時移萬人并家屬過襄止餘八千人又恐老弱在其
中切湏語統制官留意閱習如使府城池之類迨此從
容皆宜經慮張欽夫作帥時教民兵甚成紀律後來不
廢弛否無事為有事之備高明必有所處抵進其饜飲
者餘冀尊生厚愛以需召節

傅道州

伯壽

淳熙十年

某竊以天氣炎熱共惟知府郎中台候萬福曾王簿來

辱書翰且出送行詩及離泉山以後古律一編方歎服
不暇繼又蒙嗣音仍錄示近作二百七十韻富哉學乎
杜白亦當放子出一頭矣三復以還即舉似二三公皆
謂詞筆如此乃使淹回遠邦不寘之中朝使鳴國家之
盛吾徒真可愧矣提舉司止說潭道二州未報豐歎何
至相舉劾不必他慮惟財賦一節直是束手難措然非
獨治境也其餘二相必具報未由會晤切幾順令珍愛
以需召拜

孫饒州

紹遠

淳熙十年

某竊以踐長觀復共惟知府郎中茂對昌辰台候倍膺
殊祉緘書遠暨感荷無已祠請弗允眷意甚厚自可安
然以布惠政新憲想便赴上舊在平江必相熟也屯田
募兵極歎閔慮今止令郭剛於六軍中每軍抽二百五
十人就州廢圩修築耕墾不至擾民而疑敵既勤委
教輒具布之其實來諭乃久長之策也餘冀保順蚤膺
召節協剛長之慶

潼川岳漕

霖

淳熙十年

某竊以天氣炎熱共惟大監澄按餘間台候萬福比復
狀想已達諭及靖州曲折不勝感悚屯田事想便施行
今襄陽力主此議兩司若競勸庶幾有成乎李謙蒙特

遠之知近世所稀告示并奏檢照牒並封去望就使司
徑遞與前輩例皆如此也忽具記謝前况餘幾順序
珍愛以俟召節

又 淳熙十一年

某竊以天氣澄爽共惟某官特節雍容台候萬福蜀去
朝廷遠上所深念遴選膚使夫豈徒然折估弊極諸司
取會未齊官吏從官而不支俸何以養廉耶益并利害
必已熟究未由再昭切幾順序珍愛佇膺殊獎

某辱季春書翰貳以長牋禮意甚厚且聞塞惟又以為
喜北方遷都意向叵測正宜自治如四川近裏皆蠻夷

因循弗治其弊非一義勝軍夔帥雖極力措置但恐協
力者寡未易就緒瀘叙尤不可不留意近者理會城寨
官有兼巡尉者已行下選差此乃使司職事且望早與
差注大抵萬事以得人為本不然雖有良法美意皆成
具矣

蘇倅 玘 淳熙十年

某辱書翰喜承台候萬福按行良勞所示利害詳悉不
勝感荷今民力困甚頃中外每事優恤乃副上意此未
嘗一日心安也舡費向來計數與之不謂先易後難致
不足用今朝廷何緣更有支降已劄下制司及水軍相

與那融亦聞彼有利源第未審多寡夏既忠朴望與商量稟制帥共圖之餘續馳報也浚河利害初未嘗與聞便中幸示副本庶可贊成杜詩稿蒙傳錄幸甚魏公集既未能刻板筆吏或有餘能傳以為惠否干叨皇恐景迂祠堂記已領餘冀若時珍練別需晉用

張靖倅

孝魯

淳熙十年

某竊以春序猶寒共惟通判朝請台候萬福書翰遠貽且復詳陳蠻洞利害本末非特欽佩愛予亦以知賢別駕留意邊防如此之至不勝欣感為官擇人最為要說所謂市馬若非前日吳汝翼百計招誘之則羅鬼國經

隔部族甚多決難遠涉而來此聖上所以注意安靜以杜後患未審衆議今復如何嗣有所聞毋惜垂示不敢洩也餘冀保喬別承寵渥

某向蒙諭及外邑闕官緣事在三省勢湏下部勘當遂未能盡如人意歲計今既改就總領所莫稍便否治境風俗圖舊聞一二今得詳觀他日可附王會篇矣劉友諒不職如此奏劾固宜二漕俟通書當及財賦事併幸
照亮

婁提幹

淳熙十年

某辱書喜承尊候萬福班馬字類深敷該洽史遷古學

一旦發明於千載之下何其幸也敬藏篋行不勝感刻
別帝所諭謹悉汪幹初為一二相識所惑欲退闕銓曹
又贊之致此紛：既得來示即取案牘詳觀且令作執
事一狀明言朝廷若許汪退闕未審其合與不合還江
東若許還江東則乞通理已歷淮東月日又說破將來
舉將足則慮成資如此則往來兩路皆裕如矣淮章萬
一不足江東又可摩畫所謂渠成秦利也餘冀保愛

胡殿撰與可

淳熙十年

某竊以天氣炎熱共惟知府殿撰台候動止萬福祠滿
宜被晉用便通諸公書為佳李子大竟不起賴高誼率

寓公助其後事欽歎無已四一姐當何以處之能同子
壽赴柳州否豫章諸位縱待制有遺言今必不能周全
蓋自揀之不暇耳元弼亦不說曲折或有定論幸垂諭
如錢物之類此非所惜只要安頓得是耳餘冀以時保
重即承天寵

延廬師

壘

淳熙十年

某少事布聞濠州效用王寶訢部將張琦事其初必
是寶作過逃遁故琦拘其妻口寶既怨恨遂許琦擅召
人冒代承請共一百一名朝廷若盡情根究却恐眾人
或不自安今只委使司疾速依公結絕望密下濠州根

問張琦因何以寶妻給與張整其曲直便見不必理會
承代一節也却別降旨將濠州使效盡數開具年甲鄉
貫及所習武藝除正名外雖代名者皆與從實注籍仍
舊支破錢米目前既安人心向去庶免冒濫并要部見
轄將官職位姓名亦望密以書諭濠守子細理會勿令
騷擾乃善去年淮東強勇軍之類已如此施行矣恐欲
知曲折故此布叙切幸台照

荆鄂郭都統

杲

淳熙十年

某竊以秋氣日清共惟都統刺史轅門整暇台候萬福
比幸數面殊以尉懌茲辱書翰又深感刻暑行勞勸喜
聞已遂善達屯田運穀計有餘裕中元後所在得雨襄
漢如何向諭及就部曲中擇統制稍異其名且示以暇
日往來之意適因聖諭遂降指揮望蚤以名聞趙丞相
帥荆它日民兵可壯軍毅亦一助也有委望以幅帟垂
示餘冀保愛以需功名之會

又

淳熙十一年

某疊辱書翰喜承台候萬福邊防至計莫大於協心以
濟國事益庶蘭猶且交歡李郭亦相勉忠義况都副
帥本一家乎非都統家傳忠孝濟以智略安能及此欽
歎不已嘗縷悉奏知天顏大悅繼此別當詳布不知閣

帥幾日到彼後進宜有以教督之吉輿忠有旨特差一次單君朝夕陪侍亦可喜也羅守止此殊可惜聞其家甚賴調護幸甚餘冀若時珍愛以需異寵

又淳熙十一年

某近拜狀想即呈徹秋冷共惟台候萬福通筒報巡邊事不謂盜折已嚴行根治期於必獲也北界動息如何或傳葛王諸子勸請乃父還燕又傳西夏頗擾邊未知果否自治之策屢常奏稟每念荆鄂邊面西至金均東至光黃橫亘千餘里昨緣兩帥分認地分議論不協由此合為一司或疑兵馬數少難於分布則紹興初岳忠

烈獨當一面所統兵不滿六萬尚未及今日荆鄂兩軍之數徒以將士賈勇措置有方遂使襄漢莫枕宛洛震動及庚辰辛巳間聚八萬之衆於襄漢僅能自保其利害得失蓋可見矣今都統自襄臨鄂恩威素著比得來諭深以前人分彼此為戒緩急欲竭力赴事功此古名將用心也閻副帥欲先稟議然後赴鎮想曾子細商確雖云敵之衆寡機之先後難盡預度至如規模布置在我者必有定說謂如其軍可使轉戰其將可使犄角孰為要害所當力攻孰為藩籬所當固守能定能應兵家先務尚幸詳報即為敷奏也如江陵必已與沂公同計

料守陽羅以固家計戎隨州以護三閩閩副帥切以
為言到彼曾熟講否游九思若都統援鎮江例似亦可
行又未知此君肯遠適否更望斟酌當奉成也餘冀以
時珍愛佇俟功名之會

又淳熙十二年

某近嘗遣狀想無不達都騎幾日度江峴首金城屹然
今復施之江陵足為永久之利上恐湖北水退稍遲興
役迫冬專令諭旨若陰雨寒凍即須暫免上役以執事
治軍嚴整加之仁恤何事不濟區區版築豈勞總督也
恕未暇他及續當馳布

又淳熙十二年

某比遣記幸無浮湛辱正月手書至感赤目雖愈而瞻
視遂昏衰年固應爾也虜中傳聞不一邊頭得端的否
有備無患餘非所問襄陽一帶後來得雨否迎送頻併
豈易支吾王帥守邊未必非所長言者既弗察亦無如
之何也陳克明辛立已如來諭它續馳布

又淳熙十二年

某蒙書翰至感李汝弼差遣已得旨依黃夷雅旦夕將
上它有所需勿外北方竟未知端的彼此懷疑僉兵括
馬造舟殆無虛日中間又妄傳契丹之擾惟荆襄全無

報豈非烏林答在汴京獨安耶修城錢已差人管押赴
總所：在城壁年：修葺隨即損壞惟襄陽屹然如金
城乃知經畫於初者既為悠久計則後來必然不費心
力今荊州賴提督當無慮矣有所聞毋巨細切望諭及

又淳熙十二年

某比遣記幸無浮湛茲蒙諭及江陵修城曲折亦聞之
業以增給將來所費必過元料奈何昨沂公再三密見
諭謂工役云初事體甚重須煩台旆一來所以專降指
揮蓋規模一定來春甚易為力茲必然之理也大石林
牙果是虛傳虜儲允恭死却恐端的天時人事勢應豫
善
備上流重寄正賴卻穀更幾勉旃與同官得旨如別幅
不敢入吏手以防漏洩望密垂報當為進呈或徑奏尤

書稿卷第十一 終

書稿卷第十二

周益文忠公集一百九十七

劄子九

張子儀總領

抑

淳熙十一年

某竊以歲晏凝寒共惟提舉寺丞澄案餘閒台候萬福
 手書為况甚慰馳企一道歲事絕長補短當得中熟錄
 示榜文及水利冊深歎盡心屬吏奉行固宜惟謹趙陳
 譚三省旦夕將上必減磨勘循資也潞公帖傳之樂石
 真可不朽當時納真本決不至遺墜細觀文意正爾相
 屬登高能賦可為大夫自不須更用扇對况下兩字亦
 與登高不類似無足疑蜀中有公文集偶隨行無本試

閱之如何未由會晤切幾順節保育以需嚴召

又淳熙十三年

某竊以歲事更新共惟某官澄按餘閒台候萬福褰帷
遽部非特寬上頌憂而一道利害以次興除足行所學
長箋別紙遠紆盛禮感刻無已柳桂易動難安最宜為
曲突徙薪計大要財賦白撰必擾民產亂中間嘗因李
壽翁獻言欲與打筭補其闕偶為國瑞權夕即妄有沮
駁至今以為恨然錢米數極不多使司亦通融前政所
見不同不肯為耳垂惠無窮不在節下乎某連日腰痛
轉動不能勉強作此殊愧草率餘惟順令珍厚眷倚方

深行慶環召

又紹熙四年

某竊以首夏清和共惟總領少卿寵渥維新台候神相
萬福某比復狀納令弟網帖方行數日而即報至竊審
復正卿班仍董軍餉盡還舊物可卜隆眷自茲持橐無
可疑者某雖以天假依茫之幸緣日疾心疾交作已力
控祠請旦夕必遂亦未知入境之日所以未果專致賀
緘適李壽翁之子正夫部米運行必獲迎拜畧叙拳
餘冀相時珍毓對揚天寵

某少事向蒙諭及此間財賦素號從容某既來知其

入頗不正上下相籠幸免人言自惟衰懦素以奉法循
理為心不敢稍越常規又連年云：去年常欲懇元善
少卿輟留一綱少補不足未蒙周旋不敢固請今就託
李丞面稟曲折謂如郴州戍兵舊調鄂軍五百總數歲費
數萬緡而軍士寒暑往來損折甚多某向在客院適林
黃中守長沙嘗諭令改用此間諸軍自此使所省此一
項支費而本州借請折洗却費萬餘緡何所從出漕司
減折糶錢二萬緡罷橋口酒利數千緡遂以坐困凡某
百方苦節而略不睹從容之效者以所裁多而所支夥
也今方四月已闕軍糧未免借兌豈為久計未審可因
元善告新之際許從前請否某業為歸計渠成未知為
何人之利然一方所繫不應專為身謀也幸值故人敢
以情告餘續具記

又 紹興四年

某竊以氣應黃鍾日舒化國共惟某官道隨剛長祿與
人宜台候動止萬福真才懿行詳試滋久入持禁橐不
在此時乎某幸依大芘無從面賀哀病廢學又不能敬
占公啟謹以手劄致拳：尚幸台察寒威方勁倍祈寶
御至和對揚天寵

某比具記想達台聽年至病侵技窮秩滿負四宜去備

嘗滙懇於兩社間然後入奏丐歸謂可必遂今詔函復
下進退維谷最是短於理財前到此只作一年計不思
承例歲貪二十萬緡所入招徠偽契興訟以困良善一
切罷去俟後人自為之豈料因循許時猶未得代遂成
商君之法來年常賦外當辦大禮十萬緡束手無措倘
用是罪去亦幸矣米運科撥告早行下若比常年近郡
多遠郡少則所省水脚錢一毫以上皆是拜賜之數敢
不知歸前年初到時畧辦飛虎軍供給錢一項月四百
緡荷詹元善權免二年來正當滿繼此尚雖須致懇少展
其期聊預言之猥屑漸汗

某悚息拜問台閣寶眷欽想均受新社節中例不敢講
禮况酒如郡政視昔尤酸薄難容自納敗闕輒有閩中
鐵絲果架一事連山金柑三百顆廬陵金橘千枚臨江
披綿鮓五百顆恐可助子孫上壽之一二恃久要遂忘
觸突臨筆顏赧或有委需願聞之令茅主簿何時可至
也招軍一節本州當二百人元限二年而小民貧困
應募踵至旦夕且發一百餘人過此權住收以待來
年雖云破經總制錢然在此日給及發遣川陸盤纏亦
壞千緡茲又橫費之一端也日近復添差棟汰及歸正
任滿無替頭者增數十人何以支吾窮人命分惡祇自

笑耳

又 紹熙四年

某竊以歲晏凝寒共惟某官有政足財神所相勞台候
動止萬福闕閱在諸卿之右論思乃學術所長持此又
外得乎更冀順時致養倚對駟召

某長至禮合致賀第老病不文又不敢倩人為之故輒
以手書伸頌詠乃蒙雙緘盛禮無乃以是愧其簡乎不
然何執謙之過也後時不果貶儀以報惟深佩刻而
已

某竊人回淳勤台翰損答益深感悚米運令弟既不欲

屑就專俟改差之人襄陽綱自當先發也此間財賦月
有收支定數中間緣違法放倍稅不問年歲久近有無
爭競來則與印其訟訴至今未已也歲收一二十萬緡
用資支費者在此或不知本末遂謂富實而漕或兼權
則好事者又縱吏之將常賦削除以萬計某既一遵律
令且尼爭端遂成漏底所幸歲事稍稔節用省費乃能
支吾二年前常具布於李正夫縣丞所携之書尚蒙記
憶否諸邑緣向來監司因他郡祈禱例令住催一月之
類終過時則民戶不能併輸遂頗拖欠却非滲漏曲荷
垂軫乃敢及此皇恐皇恐飛虎四百千文字納呈僭易

皇恐

立宗卿侍郎 宣 淳熙十一年

某竊以雪後晴寒共惟知府檢詳雙旌載路台候神相
 萬福比復狀為慶何未閱覽茲蒙嗣問伏從審已拜麾符
 奉親西渡觀闕既存朝蹟嘉禾又為舊治次舍所歷蒙
 樂已多况吳門棠陰未遠開藩之後想見士民鼓舞不
 勞而治矣海寇已趣斷必無輕恕渠魁就捕非威令素
 享賞罰公明豈能臻此不勝歎服忽：布復莫盡悃幅
 願言如護鼎茵即遂來歸固不敢以隔閏暫阻一見為
 恨也

又 淳熙十二年

某竊以暑雨煩濁共惟知府徽猷檢詳政成暇豫台候
 動止萬福某汨度日音問稍疎每聆治報亦足為慰久
 雨下田無傷否聞雪川已被害也趙丞才具如此在今
 豈易得節推員闕上台已用彥衡矣浙東賊賊姜促提
 刑司而未報近不免督責却吏方云事屬浙西亦已嚴
 切行下更囑劄憲速具數來當取旨支撥二千緡甚不
 多夫何足靳或浙東自有之望徑語趙彥層申來也見
 施丈又說寨兵事尚未見公文恐是在三省耳許浦利
 害極多緩急莫須用四明故事否幸密垂報餘莫若時

珍練以對嚴召

又淳熙三年

某竊以上冬晴寒共惟某官宣威有倣德業多助台候
動止萬福某前月已丐祠旦夕得報即還廬陵屏迹山
壑以俟其老惟傾耳君侯為聖時立大功副此願望至
於後會邈然則拳拳依向又非翰墨所能寄也天氣日
益凝凜倍靳遵令衛生荷國殊寵

某比使者歸常存布尺紙想追路呈徹不審幾日開府
少城聞就夔門與趙衛公相會四川利害講之固熟臨
之以名儒碩望百城自應心悅而誠服民其有瘳矣某
欲去不能辦專介偶同僚蘇倅遣人還鄉莫的於此輒
布一二伏幸台察

趙從善泉使

師業

淳熙十一年

某竊以天氣凝寒共惟知府郎中開藩有倣台候動止
萬福廬陵大邦豈不足以為政陸守狼狽多其自取今
得良二千石一洗宿弊廓施惠術吏民自應信服數月
之後可以凝香宴寢矣惟歲歉諒勞區處諸司必相假
借因書亦當及之酒稅乃州郡利源人但知取之為取
而不知予之為取官醞若味佳私酤雖不禁亦絕二
者高明當得其要領翁超聞正是行兇人託劉成以

自解今既不貸亦足懲後矣餘莫若時珍練倚俟褒
璽

某竊承奉詔牧民涓辰洗印諒深懼愜繫官于朝既未
獲修惟梓之敬欲附尺紙為賀又因循未果竟煩翰墨
先之感懼何可言也長牋蒸麗三復叙歎冗迫無由視
儀以報又深愧悚謝章已令報行矣州宅置鑪大可駭
何至是耶幕官事只依旨揮結絕甚善追逮之擾不止
一家早後豈堪如此被實惠者多矣計若人之罪則何
足恤也路鈐虛位正欲使諸卒知有郡將近求者紛然
亦有大關節一切拒止黃林湏得一文字乃可施行向

者固嘗面言下政何順聞在廣西併望物色垂報吳政
却似愿恪若軍中人則又崢嶸矣家兄既村居恐因遣
介來望諭令取家問幸甚

又 淳熙十三年

某前日方以書付胡堅茲緣病倦未暇再遣記但切愧
企冬春之交雨雪過多未知夏秋復如何減豁旱傷多
拋經總制錢帶納常平其理灼然固嘗為貳卿言之但
此間事體執事熟知之若非視人如我躬親為郡國計
算則不過便文自營而已此文移所以山積也他續馳
布

又淳熙十四年

某疊勤誨翰知使車按部六月末方回是稽具報必辱情察天堂山鐵樣及相度措置鉛山場等並已進呈正恐招兵費大江東諸郡歲供難繼遂爾遲遲如增盆槽添作屋使司自可施行莫不須待報否毒暑異常還臺當少休旦夕別拜狀

王叔清舍人

御月

淳熙十一年

某竊以天氣清肅共惟知府安撫祕閣舍人鎮臨有裕台候動止萬福乃者嘗以幅紙附漕司人回必遂閱覽請祠文字不會上蓋宸眷如隆宜圖羊祜社預之勳豈

必揖袂浮丘也夏國部落之說果可信否盱眙謀報葛王諸子勸請還燕容或有之所奏三事屢於榻前商議萬兵自鄂移荆孰若徑趨襄之為便昨郭帥有書欲與副帥協力比過武昌必得要領兩軍緩急相應乃是朝廷命令非副帥召正帥也往者王宣趙搏勢均力敵首鼠觀望所以合而為一復離之可乎今再以書與郭帥別希錄呈荆南城已降旨揮將三之一損壞者先修矣餘在閣帥書中未由會晤切幾上體閫寄加厚保調以需召節

馮總領

憲

淳熙十一年

某辱六月晦及七月中三書不勝感慰秋冷共惟台候
萬福虛恨曲折並已劄下或欲因邛部市馬執而殺之
豈有是理惟中策當議必已見之少卿蜀人其念鄉國
之計甚熟且遠每事必欲協議蓋有深意興元旱災勾
憲來求度牒恐其後時有旨代米糶濟也 遙往復經
時民為邦本其利害又非軍旅比也洵陽求者甚衆上
時畀田侯更望勉以報國京西鹽事殆失於輕信今當
有以助之酒課緣戶部獻疑尚未降指揮然亦何疑也
雅州委制司兩易度於郭守無傷耳餘冀若時珍練以
需召節

某拜問慶門眷聚緬惟均受多祉劉韶美之子澄為利
掾望與延譽想以鄉曲之故不待禱因來通書悵然念
髯老之風度輒及之皇恐皇恐某再拜

又 淳熙十三年

某竊以歲晏凝寒共惟天助將明百順來備名儒瓌望
宜在王前升正九卿蓋以重任難其代耳綸綍既頒知
眷注之弥厚遠勤緘啟感刻難名未晤語間敢祈觀頤
致養倚俟召節

某比於雍君處領珍翰不勝佩荷雍之學識士大夫中
絕不易得可敬可愛三衙取馬生券乃是久例豈復增

損惟江上諸軍曾支破致令乞丐於市俱傷士心所以
兩次取會錢數然後下使所科撥若經不足自可申省
就椿管銷豁付漕司及兩邦民而前後爭執紛然殆類
秦越之肥瘠今秦嵩申上津仍歲水旱戍夫乏糧夫所
欲併差官軍有限豈能分布已稟旨不改其舊而月給
戍夫錢米一年既終三百餘人所費無多切望留念
即為施行大卿蜀人而又憂慮深遠固無待諄諄之
言也

彭州張倅

英仲

淳熙十一年

某竊以天氣凝寒共惟通判朝請佐理餘閒尊候萬

福三宰百里今貳名邦典郡宜矣嘗為三省諸公言之
計來夏美解當有所處忽：姑此布復餘幾順令珍厚
以對宸渥

蠻人本不能生事往：州縣綏御失平姦氓又從而導
之遂至作過消患未萌全在守令得人耳有可見教繼
此願聞至叩至叩

嘉州樊倅

炎

淳熙十一年

某竊以天氣凝寒緬惟通判朝請佐郡政成尊候萬福
名儒之子累為諸司所薦今勾龍提刑又誦淹滯可見
才譖下諭三郡即詳稟丞相已計授伐之期續議進擬

矣先德種學績文為西南儒宗頃見玉山汪尚書稱道
不容口今讀補注韓文四十五卷博洽精詳有前輩未
嘗到者此書定傳後世非獨為篋笥之珍而已欣感欣
感薄遽占謝有懷莫盡願言順時加愛即俟寵命

陳邕州

士英

淳熙十一年

某竊以天氣暄和共惟知府安撫朝議年兄鎮臨有裕
台候萬福辱去冬所惠教不勝慰感便民五事皆深切
著明洞丁緣宜州小擾未欲輕舉若州府徐、自行之
他處自可次第料理惟監貨一節利害甚重昨降旨下
帥司必已熟議地遠又隣諸蠻與內地不同凡百更望
加意上司或未諒不妨力言彼此皆賢者初無固必也
餘冀若時加愛以需召節

趙明州

師夔

淳熙十一年

某竊以歲事更新共惟知府制置殿撰鎮臨有裕台候
動止萬福控制海道事權甚重比得來文欲降錢修船
見此奏稟亦聞華弊甚多如軍中人每要立功前此例
借作白直甚無謂也其他俟續布聞餘冀以時珍愛即
膺召用

某載惟春王三朝於卦為泰若時良牧惠利及民者博
則於介祉亦倍衆人乘茲令序入踐禁塗無可疑者過

勤緘啟良佩至意茲酬來况併致忱禱切幸加亮

又

某比復狀為開藩慶想已呈徹洵勤惠問喜審治效日彰台候萬福許浦舡屢與殿司說若果欲移則當撥歸制置司今得來示若合符契也治境控扼海道平時湏過為之備近者有旨拘收借事兵卒必已施行主將能否亦望詳諭大抵早正素治臨事乃不倉皇高明當有以處之矣餘冀順時珍愛即膺次對之寵

王茶馬

渥

淳熙十二年

某竊以歲事更新共惟大茶馬顯謨使事成功台候動

止萬福辱十月所惠教不勝慰感馬政修明邊方寧謐宣勞多矣中間傳聞夷人為結連之計今必無他秦黎州既熟一方利害似難移易却聞其惧無以善後切欲歸果否嘉州奏為備甚至袁弄當不敢萌桀驁之心凡百更望與制司銷患未形想毋待諄：也後來所示教事悉已行下恐有當知者併幸忠告地遠惟恐不中事機耳餘冀保蓄以俟嚴召

王憲

正己

淳熙十二年

某竊以歲事更新共惟提刑右司平反底績台候動止萬福特辱誨翰不勝慰感牛口灘薄驚舟御乃巔石常

事不必介懷廬陵路鈐曲折極荷垂教見令戚侯就帥
司兼領正合來諭自此且未除人也向宰甚荷周旋近
漕司奏乞撥油麻錢五萬補助贛州三省方商議此乃
志道刮刷州縣以自肥而不思白撰財賦科罰百姓貽
患無窮其所得能幾何耶寧有盜臣誠可歎也忽：具
復未究所懷願加保願以俟嚴召

豐叔賈

誼

淳熙十二年

某竊以春晚氣暄共惟知府判院政成民悅台候萬福
特枉榮問深佩眷予勸課農桑千里皆務本之人甚休
甚休二月末霜雪不至深害否網欠宿逋當為丞相言

之版曹農寺自來鮮肯出豁分明只欲符移紛然積壓
登帶其實所入則有限耳忽：布復未究所懷願言若
時珍愛以俟召節

又 紹熙三年

某契勘湘潭最為大邑鄉分濶遠財賦居本州十之三
自來只注選人資望已輕又緣范承直丁憂之後本府
權差嚴縣丞攝事其人雖廉謹有餘然畏事太過詞訟
不敢予決常賦亦多積壓今來郭承直到官才力既短
適苦足疾聞訟牒日至使司自此相益蓄縮日就廢弛
本州便欲按治則初來未有顯過欲別委官對易又恐

邑民知是州郡之意望風輕侮况目前別無可委之人
欲望使司選委清強官一員與之兩易庶幾百里得受
大賜郡中亦可省力湏至具稟者

劉公實提刑

穎

淳熙十二年

某特辱書翰喜承近別台候萬福按行不無少勞碩逕
文字極為詳備旦夕納公文去殿司元約蓋寨屋伍百
間今既移青龍三百餘間所增亦不多惟民田湏依時
價酬之此非軍中所能區處上令漕司同平江應副望
道此意於使軍也軍人被殺可駭聞殿司已重賞緝捕
未知可得否暑甚占吏草續馳布敢幸台察

鄭少嘉尚書

淳熙十二年

某竊以炎暑可畏共惟某官治化已成台候動止萬福
海舟既未敢遽集勢湏先以告戒恐誤其出入蓋敵情
難測諜報造舟東海在我安得不為之備耶臨安五月
八日五更地震近得江西閩中報同日如此浙東如何
不勝憂懼之至鄒坦者家間素服其藥近赴使司駐泊
若無所用不審可差出令一來否僭易知罪餘乞保輔
冲襟以需登拜

閻才元侍郎

淳熙十二年

某頃嘗奉記惟緘啟盛禮坐待來价需報遂成稽晏非

敢怠也茲辱五月誨翰喜慰亡喻教閱義士誠不可緩
 王去惡久移益部得旨煩侍郎別擇人來上貸緡五萬
 亦已曲從惟茶馬總領打筭事非密院所能辦而夏官
 主興元置監休息宕昌綱馬甚力正賴區處修閔費終
 千餘緡姑置之蓋取其大則小可畧也邊報難信虜儲
 則果天未知誰立擾：萬緒其自茲始乎增秩辭免中
 批不允諒即祇拜偶都統司急足回撥冗具此未暇他
 及續別修染

又 淳熙十二年

某游勤書誨亦嘗遣問然豈若款奉笑言之為樂也邊

備飭修圖籍精詳粲然形諸奏劄謹為涓吉進呈大契
 上意西清次對從天而下某與副樞竦聽欣然豈南門
 既闢氣象益新遂底文明之效歟多賀多賀田世雄自
 漕司案其暴刻之後朝論紛然適李正之封送金州權
 郡所具斷過人數止是兩名贓重者配本城餘皆賤私
 茶人刺為廂禁土兵平利令王仲圭直以涅軍為徒流
 安得不駭聞聽徧示朝士眾謹稍息改守沉黎上以為
 然蓋三省共議非其能致力也然望執事亟作書勸其
 凡事謹畏以避謗嫉大抵守邊以廉靜為本而以措置
 備禦為急來則應之夫復何慮使政績勝前不負荐口

豈惟渠之幸亦國家之利也連日暴下草此為慶續別拜狀

劉帥立義 淳熙十二年

某特勤惠翰喜審台候萬福畿西重任兼總司非時通才豈副遴選瑞麥少蘇累年之旱隨州亦有繪圖多賀多賀即生反覆如此幸前後所降旨揮斟酌照應不至背戾止緣朝士每得偏詞輒議論不一如揚嗣勳極通練其施設必繼高躅糴糧固嘗博詢眾議監法在三省不得而與也邊報皆妄去秋王清叔已報西夏大石擾擾且云唐鄧戍兵皆西北去其說譎類此可恠可恠鄧倅胡大中庶勤解事恐遠方難得屬吏委使故一再言之餘莫若時保愛以需召節

楚州錢大受 之望 淳熙十二年

某特蒙諭羊沒再任已得旨依劉超云楚州方城器具百無一有莫須早到擘畫否朱振又殂誰可當其任也上於財賦甚留意聞前政所積已支盡當思善後之策揚帥每以招納北人為言所選使效更宜詳細他續馳布

又 淳熙十二年

某疊辱誨翰喜承收御宣勞台候萬福招填忠義人年

齒皆壯若訓齊有方他日必得其力民兵萬弩手諸郡
申請不一全在區處如何耳修換弊船想極如法海湖
鷁船不妨密切措置緩急旋集欲立賞格須別作文字
專一論此前以打造費力遂併寢耳防城具俟奏下即
為取旨帥漕比稍通情否有我護局賢愚通患惟以國
家為念則不然間探一事最為要切前後多不得實均
望留意兵法尚詐北虜尤甚雖死亡未嘗諱專欲其所
圖輕信定墮其計劃神保之子已回否其人恐能言大
槩也陳汝礪說雖是更須物色其實仔細垂諭海道風
色難必倉猝能遽至否張佐戀舊居未肯赴辟喻口等
處皆要地而部吏出職者以力而求似非所宜願加審
擇

又 淳熙十三年

某竊以青和紀序共惟鎮撫邊城台候萬福百廢具舉
甚副隆委虜中調兵造舟又修汴宮姑以防戰抑別有
說耶樓櫓等支費太夥如何應副新帥如到更須熟議
務令可行乃善羊友諒想已歸凡百所聞毋惜垂誨餘
冀若時加愛以對來渥

張彥文尚書

淳熙十三年

某竊以秋暑可畏共惟某官政成民悅台候動止萬福

其尸祿無補憂懼萬端坤載不寧連亘數路聞閩中尤甚上因趙子直奏疏遂以親札戒帥憲謹察盜賊消患未萌富沙風俗素獷豈弟中和當有以化之矣未由晤語切幾遵令衛生以需大用
其特枉誨翰諭及添差官謹悉如端正一項堂除素無藝極兩年來並已限員只是諸軍將佐隨其立功次數例帶外路差遣止得一任向來逐年發遣故無擁併四五年間偶緣水滯留在軍中不覺數多然未嘗不分在諸郡自夏中得來文即令住撥其後兩員乃先差而續到非敢爽約詳悉已令劄下敢幸台照

高汝一 變 淳熙十二年

某比拜狀想無浮湛茲辱誨劄不勝感慰三事奏已下並得處分積糧若止望坐倉恐未易辦其他如度牒召人入中之類亦可行否更度彼間要切者具奏為佳神勁軍千人幸加訓練保捷亦宜措置但無噐甲則亦徒然効用恐總所難應副兼諸軍請受薄而彼獨厚恐併神勁牽動爾比盛傳大名林牙擾而黃河南北繕甲積糧泰然無虞深謀熟計畧可遙度襄陽為國門戶尤宜過為提備望與都副帥熟籌之

又 淳熙十二年

某比方拜狀茲未暇嗣問神勁將官奏已為進呈只從使司便可也所陳便捷及忠義人誠為可用上以皇甫斌是個之子彼間一帶人情極熟緩急亦可作一頭項故以使府鈐轄令提舉蓋行少卿之言也乃公得祠未必不同行宿將頗有人望但任性少委曲語言多犯人其實無他吾曹方以國事為念自可容忍因會閫帥千萬及此意幸甚

又淳熙十二年

某竊以秋暑已闌共惟某官為國長城台候萬福辱書翰不勝慰感樊城南關萬山誠為要切今冬郭帥巡邊

必可熟議兵力難分願臨時應變何如耳儲粟尤不可緩効用錢米恐總領所力有不及耳民兵器甲既閫帥肯抵換支撥善不可加已得旨依以備緩急若為悠久計則酒諸司通融乃可所謂紙甲珠省費又不知能當箭鑿否宥昌馬續馳報餘冀若時保畜以俟嚴召

又淳熙十三年

某跨歲大病今雖勉強朝叅猶未全安所以不及親具記皇甫鈐轄因會煩再三致區：邊頭諸事草創分職云初凡百且徐圖之忠義人更委曲與郭閫二帥商量既彼此為國何患議論之不同也大抵無事為有事之

備者最難蓋因循則誤指準亟更易又張皇以此全在
深思熟講耳噐甲俟再報即取旨閣帥欲成彥節為正
將主上已從所乞矣

利路李憲

大正

淳熙十二年

某竊以霜冬晴凜共惟提刑判院按部雍容台候萬福
數勤書翰不勝慰感遠方法禁素弛得賢使者一洗舊
弊列城受賜為多非特席逸也忠勇軍比平民湏稍寬
假他日乃可責其用命今委田世雄佐帥府稍加料理
未審當否田在金州或謂猛於治盜而賑濟有功如此
則與漕司所按不同姑酌其中付以戎事更望因會勉

以凡百謙退志其大者遠者甚幸龐守所論西和草料
錢極有理若監司總領視州縣為一家民力自然稍寬
不然上下督迫其害不在今日也王樸所陳甚詳然未
敢徑行當委所屬相度正恐悠々耳凡使司所當為如
如酒場之類自宜力與改革以副臨遣之意如博易抽
差等不妨具奏上於遠方利病惟恐不聞縱有不悅豈
能勝公論耶奴兒結事備知本末大石林牙無能為也
禁銅錢三省屢畫旨其施行頗峻自此必須少戢噐噐
物料旦夕當行下修闕立砲所宜詳審蓋彼常疑我掩
其不備若一切不問緩急又將失備計常與才元侍郎

及軍帥議之軍糧折估見作措置其他凡可垂教毋惜
諄：並不敢泄也餘冀保愛以需召節

又淳熙十二年

其相望悠緬每患音驛之難繼但極馳企辟一二屬官
并南平倅皆已施行換錢引限衆論不一更與制司熟
議為佳西府曲折前已遮護毋慮毋慮叙州乃沂公姻
家制帥所以芘存之馮鄉人多稱譽若私其鄉黨至誤
公家事此今日大害雖賢者不能免可嘆可嘆

邵鈐轄

之綱

淳熙十二年

某承惠書喜承起居佳福勝兵事既易帥固知未易料

理然忽而不問又非悠久之計已劄下帥同本軍從長
理會新守幾時到更且協力措置為佳易地似太早計
勉圖事功以俟獎擢此外萬：保愛

鎮江翟都統

安道

淳熙十二年

某連辱書翰不勝感慰山陽重地劉超名將都統又再
三丁寧必能盡力軍務最是間探欲明苟有所聞切幸
垂諭令似升差緣奏狀未曾降下不敢先言又近日臺
章方論將佐事勢湏少待崔統領深知其熟於淮上形
勢偶詔三衙荐夔路鈐轄而步帥謂堪此任故煩一行
張世英是武舉出身上欲激勸來者姑再令從軍前已

用都統奏而罷之今豈有用之理不必過慮也

雷馬帥

世賢

淳熙十二年

某辱書翰至感吉統制事緣北方正爾疑似不欲遽有更改今議論先定俟彼動作為之未晚也六合收放亦未須行蓋因理會券食錢議者遂謂增添財賦煩先會計所遣新馬實幾匹隨行實用幾人有無家累數月間共合添錢米若干速為垂報即當奏稟行下既止一兩程自不難辦並此奉報切幸知察

金陵閻副都統

仲

淳熙十二年

某近違已深傾向兩辱書翰喜承轅門整暇台候萬

福宸翰寵頌益彰眷倚諒深惟慶若便刻石則須多進十數本恐上欲分賜諸帥耳王統制用十年之勞轉官雖常有例久不曾行今茲乃聖主特恩知將厚矣因來諭輒及之餘冀以時珍愛佇俟功名之會

金陵郭都統

鈞

淳熙十二年

某近疎奉記不勝傾企虜儲天折不知誰代其位聞葛王尚留涼淀九月還燕未審果否昨總所被旨刷具軍中營運等事馬司者到已多日獨使司文字未至專待此同進呈不可緩也執事忠誠許國公正提身雖古名將何以加諸上所以眷倚士大夫所以歸重實在於此

然人心不同如其面烏豈能一：皆能如意副貳所陳
 縱未盡善有可行者毋惜俯從偏裨中亦宜細夫并包
 去其泰甚益是：非：本為正理然習俗已久聞聽易
 駭革之以漸容之以量固所優為苟有所聞既荷心照
 不敢不告耳過目即焚之可也

又

某疊辱書翰喜承台候萬福向者巡邊所陳要切非如
 他人為悠：之談此固上所深知而公論因以歸重不
 勝歎服大石林牙恐是虜中別有深意故揚此聲使我
 不疑茲可備而不可喜也結約事前監甚多豈容輕易

更須多遣間探時：論及幸甚李浩等想已遣來副帥
 和易凡百必與之商量自古名將惟以果毅忠：為先
 後世乃多脂韋朽虛今左右卓然自立心乎報國雖未
 能諧俗天豈不可恃乎

江州劉都統

光祖

淳熙十二年

某竊以天氣清和共惟都統刺使台候萬福寵升階秩
 遙領即符異渥沓來可卜宸眷疊勤書翰不勝感悚汪
 賓緣近例不差額外上以都統荐之甚力已刷得中軍
 副將一闕處之張德明亦如來申惟張堯臣者比因步
 軍司奏辟吏職玉音宣諭屬官須用士人兼言者方論

創闕事遂不果行其他有可垂諭者勿外餘冀保愛

金州田都統世雄 淳熙十三年

某比復狀想無浮湛再勤惠問喜承台候萬福秦守既交印必相與協心為邊防永久之利幸甚幸甚折估事總領所報到方可施行修閔增戍已得旨行併幸字照未由再晤切幾遵令養生以俟功名之會

鎮江張都統詔

某特勤誨翰喜審消辰視印號令一新百順來備沉識精忠自結上知今茲選擢正賴洗滌宿弊有可垂諭者勿外為幸巢縣城壁恐復因循雖令李候疾速相度庶畢其說尚未報也捐行囊以助用久無此風矣顧君辟闕緣從者已離彼遂格而不下若欲其來京口却示及公文也餘冀若時保蓄以需功名之會

又 淳熙十三年

某辱示翰喜承台候萬福示諭備知曲折聖主明如日月自能洞照不必過慮巢城緣有民居民田恐議者指為搔擾所以再降指揮幸速選官同黃漕審究利害只俟回奏便有處分切冀垂亮秋暑萬、保愛別需異數

金州秦守 萬 淳熙十三年

某辱惠翰喜承守邊暇裕坐膺多祉守閩隘人前後州郡與都統司爭執不一要之任責則同難頓改易更望多方措置為經久之策深恐水旱頻併事力不及已得旨令總領應副三百餘人錢米一年既有以恤之人必欣然或總所未暇科撥使州且逐急那兌為佳不然或致流移悔無及也恩：姑此布復餘冀加愛

揚州鄭帥興裔

淳熙十三年

某辱誨翰至感示諭修船緣虜主遷都淮民已多疑惧今若從使司行下則文移紛然必更傳播不免徑付諸郡使府其一也三萬緡上決不惜但船數與張撫幹文

字頗異同今既各郡為之若密委信實人料理亦自不難所費且與那兌候見多少申請支還未晚江湖打造不特所在科擾兼差人撐駕遠涉其費又當數倍矣教民兵事曾條具否望蚤理會仍須與解事人商量庶令適當聞每次多成紛：皆由區處無術耳遽具占報草草切幸恕亮

又

某竊以秋氣漸清共惟知府安撫都承鎮臨有裕台候萬福比具緘啟為賀想已呈達茲勤劄翰不勝感慰巢縣城壁旦夕取旨惟濠與安豐不能禁戢踰淮盜馬之

人甚至殺其主簿果爾將來必移文會問彼未嘗聞盜賊涉吾之境此却數：有之安得不問比已劄下望與措置施行高明處此固應綽有餘裕更幾順令保畜以對殊渥

鄂州閩都統

世雄

淳熙十一年

某近別不勝傾企即日想已抵治所履况集福荆襄沔鄂邊面濶遠西自金均東盡光黃昨以王宣趙樽各占地分不相為用遂合為一軍議者率謂兵馬數少緩急難於分布殊不思岳忠烈兵不滿六萬而能往來襄鄂內撫外禦威望隱然况今三處屯兵視昔固已加多若

更招募不特財力有限亦恐未必精銳如向來庚辰辛巳聚八萬之衆于襄漢當劉萼之師畧無成功其利害可睹也此得郭帥書深以向來自分彼此為戒遇敵則竭力相應甚有古人之風左右過武昌必已熟講雖敵有衆寡機有先後臨時應變難以遙度然我之規模自應先定大要得士心則寡可敵衆古今不易之理也守陽羅事及隨州增戍曾熟議否既開幕府凡百宜一條具奏聞却示副本此外萬：為國保重

又

某辱示翰喜承墨線臨戎體中安適高帥劉漕皆有志

事功凡百必能協心慮遠幸甚幸甚江陵城已依來申
且令都帥先往飛虎事見此商量買木亦施行指揮內
令安撫司津發者蓋緣帥司向來曾有文字謂本軍利
於興販今更委曲通書為佳激犒士卒使之精銳最為
急務冗兵雖多其實何所用也所荐三人上皆令津遣
赴審察矣餘冀保愛

又

某屢勤書翰至感趙晟傳汝揖輩到軍當已久成彥節
便往供職否招軍事得趙總領報應募漸多更煩留意
王瓌其來極遲馬司辟闕為人所先殿帥與之厚必別
與周旋也諸軍射鐵簾上欲激勸勇士若候式樣却恐
後時一面令閱習為佳城役正勞神用他續奉狀

書稿第十二卷 終

書稿卷第十三

周益文忠公集一百九十八

劄子十

王謙仲樞使

淳熙十三年

某竊以春晚寒暄猶未齊共惟某官永慕栝椽百神
 扶相孝履支持自承杖桐護匱每切馳鄉日困應酬
 未能以尺書道拳：乃蒙遠墜書翰愧感無已襄奉
 在即恨奠送之無由三復誌文詞義懇惻追踪前哲
 尤用欽歎挽語固願勉強適半月感風今猶憤：未
 能下筆姑酬先辱續別拜狀餘奠節哀自重臨筆頌
 望

某悚息拜問惻內眷集緬想長少均安王道夫去後
上每諭三省欲與倅偶無近闕惟石城二年遂就部
中取以與之恐欲知也此有所需切幸勿鄙

又淳熙十六年

某伏辱劄翰具審旌麾引道計今榮戟已開又聞減
省近吏裁節從物一洗近日之弊相饋送雜費例皆
以律令從事民力其有瘳乎愚之姑此布復切幸台
照

又紹熙元年

某竊以季春之月天氣暄和共惟樞密知院大參幹

旋鈞樞惠澤夷夏神人交相鈞候動止萬福某杜門掃
軌遙資河潤瞻承悠邈悵望徒深敢祈妙畜天和佇登
冢席宗階進陟未敢為門下賀也

某自違英矩旦晏懷仰既收朝蹟不應通名政府勢所
當然高明必賜矜亮因恃以無恐豈謂情誼拔俗未忘
雅素專介貽問禮意優渥三復感浣殆非聲畫所能形
容也明公聲名震古今事業掀天地臯夔周召不足進
焉日與斯人涵泳美化於田野間為幸大矣他無足
云

某衰老得閒復值明公億寧內外得遂麋鹿之性每

切感愧問及敝廬尤荷眷恤初乃民居絕無人煙其左
依城右逼官路不容展拓秋冬尚可度暑則費力平生
在畎畝常懼踰分今處之甚覺裕如又向忝要近凡拏
累用度每令窘束歸一切聽其支費往々恨降之晚緣
此亦復相安此乃狙芋之術前輩嘗用之矣聊發廟堂
一笑

又慶元二年

某竊以春半氣序暄和共惟某官德施威暢夷夏帖泰
默膺多助鈞候動止萬福某老病杜門坐俟掛冠之報
毋足齒記帥牙在望晤語無階敢幾調適寢羞即登冢

宰大攄相業

某自承易鎮近藩浸還異數知延登之有日自合亟馳
賀問屬嬰疴伏枕旋值國郵憂傷憔悴微軀且不自保
則於人事宜其一切廢絕然常愧負方寸敢圖謙德過
厚專使賜以好音豈惟大激哀懦其厚士風多矣感作
固不待言也明公學術精深規模闊達歛惠荊州固已
福及京師上以先太師澄清之效夙著湘楚思廣繡衣
之好以彰世濟之美復煩此行非先一州後天下也曹
參趣裝茲其時矣不勝頌望之至

某竊聞譙門已遂起工誠急先務記得題梁是紹興乙

卯席大光名銜適一甲子而復興非偶然也惟城壘一事往嘗與豐叔賈議定然後有請旨揮既下而叔賈為彼門二三多口士人游說百端中變其說欲大起民居廣開壕塹如邊城之為殊不知內郡與邊防異一則不可無垣墻二則舊基尚存茅為古木蟠根日摧月壞故命軍士芟除已見遺址若非叔賈異論則癸丑年自可訖事當時展期非畏九良星不得已耳次年某去而元晦安肯續前人之事於是有裁截之說若謂兵布于上以冀防托則雖子城亦難周徧緩急守禦顧方畧如何耳此甚易曉也今輒灰日就毀棄良亦可惜

未審明公亦有意否因筆及此正恃雅契惟一笑而恕之

程元成給事

淳熙十三年

某比辱二月二日台翰喜承靜治成功台候萬福昨復狀幸無浮沉繼以賤體三好兩惡倦於執筆遂稽嗣問第切企仰近日宇文尚書上殿論諸郡不依淳九約束招廂軍已有旨令監司具折望檢照元旨揮全文蚤為區處幸甚繼此切望行下諸郡勿令違戾幸甚餘冀若時珍齋誦周南之滯者甚多行慶嚴召

某惶恐拜問慶門眷集緬想上下攸寧樂平之諭謹悉

亦知曲折也泰之祠滿諸公欲以一郡處之竟未有深
以為念想常通書有委勿外

又

紹熙四年

某竊以歲華有倂共惟致政待制給事年德加新燕
居日適台候動止萬福昔人有云無事若靜坐一日
是兩日台坐急流勇退從容葵心秀野攬有之間白
日自長修齡方永區：羨慕豈惟鄙夫愿加保調副
此頌詠

某比於奏却附記解釋前詩其至必稍速黜縣人逼歲
方到祇領教墨感慰已深二記詩序綠筠岡賦等又蒙

誨誘彌勤三復久切歎仰給事早以奧學瓌詞獨步一
世得謝而歸齒宿意新詞旨敷暢視泰之加醇明烏非
特知筆力之日勝又喜壽祺之未艾也某素號淺拙老
益謬悠兼之心氣時作久置斯事近用沈存中法以膠
泥銅版移換摹印今日偶成玉堂雜記二十八事首恩
台覽尚有十數事俟追記補綴續納竊計過日念舊未
免太息歲月之沓：也桂林虞衡志會飲滑稽二帖并
考坡公在宜興歲月併致斐几道遠不能致他物皇
恐

又 慶元二年

某竊以歲事更新共惟致政閣學給事道隆德重神人
致喜台候起居萬福相望悠緬再晤無階念舊思賢寸
心日驚敢祈保輔寢養永綏吉祿

某比審上思正元之名臣紹熙之舊學特頒異數進聯
學士之班仍錫身章以昭殊眷初聞出命亟於克之書
中畧寓歡悰敢謂謙德過人先貽函教諄勤累幅感荷
深矣仰惟天爵自尊形於訓詞而上皇夙敬師模又
將安車趣召於兩宮交懽之日由今以始當不一而
賀云

某自蒙恩得謝本可閑適而稟賦素弱老益多病近
復耳聵目昏步履亦蹇來諭神明不衰豈夫子自道耶
康廬竒秀甲天下山樂天殆非虛語春暖杖履若再至
彭澤則趨四月游覽五月避暑秋涼言旋似為得策未
審有此意否廷秀相去數十里非經昔不可往還歲才
一會面却常：通問因台諭輒及之

李秀叔參政

淳熙十四年

某伏承公劄諭及鄭康孫事謹悉上既覽奏即令改充
閩中路鈐此關弄印頗久今茲親擢益重宗工之薦也
下政劉堯卿雖將家未知能稱職否向蒙諭及蠲免舊
欠三省尋裁減萬餘緡自有堂帖所以不敢別具復併

乞鈞照

又 淳熙十五年

某竊以孟春之月風作峭寒共惟某官綠野雍容神人
交相鈞候動止萬福某尸素無補日切汗顏侍拜悠邈
更深傾仰：祈妙齋真粹以對趣召

某久違英矩懷思不忘曲荷謙光時賜書教每一展讀
輒慰快彌日不能自己蓋道德之隆詞翰之勝有以服
小人之心者如此非勉強而然也

某恭審以大學士之稱榮使珍館輔臣異數近世罕偕
涓日而拜絲綸播紳莫不欣服尚稽馳慶首辱華緘悚

息交深尺紙莫究萬一尚乞鈞照

某密瞻行馬無由往奉杖屨遙想功成名遂燕處超然
起居惟適之安丕享無窮之樂回視某輩強心為智憂
謨畏譏揣：度日者其勞逸益相萬也因書自致不覺
切怛

湖北趙提舉善譽 淳熙十三年

某竊以歲事更新共惟某官台候萬福去歲日至遠勤
書翰來介不俟報遂稽具賀必辱深察治部大稔殆澄
清之效耶高波等課利歲僅百緡而四十五處被擾若
非賢使者表而出之遂將為無窮之害諸公殊歎服也

末由再晤切幾順令珍攝以俟召用

又

某辱六月所惠書喜承台候萬福湖北今歲雨暘以時豐登可必舊欠正宜少寬每見他處人力未蘇一遇收成官司便加督迫往々反思凶歲况湖北民貧又非他處比今得賢使者遠方有所恃矣王宰極荷芘存恩姑此布復餘幾順序加愛以俟褒詔

王宜州 侃 淳熙十三年

某竊以清和在序共惟鎮臨邊藩台候萬福才猷敏茂著聲交廣固應頻被褒重過勤緘啟欣感無斁禁

軍土丁既已措置詳備蕞爾蠻獠自無能為至如錢監却當按月支與監固易得但聞般運費多漕司未必如期應付州郡畏外臺不敢力爭此利害之大者惟高明嘗為曲突徙薪之計甚善餘冀以時珍攝別俟召用

韋翌 淳熙十二年

某比幸數面知名門雋胄自不凡也別後方切企詠並辱書翰喜承啟處之間百順來備特進蚤以文受荆公之知平生浮沉中外浩養益克觀遂佞之篇槩可想矣臨汀副墨拜嘉甚感永惟厚積嗇取鍾英夕

拜致位近班直聲凜然雖不大用其遺後人則多是
以先使君名在循吏執事復治縣有聲今雖附從幕
府其進益未央也臧孫有後理有必然更冀保願以
副所望

其上問眷集均社柴御暫閑可念馬綱事切中時病
極感有所需勿外

木安豐

旦

淳熙十三年

某比月初嘗復狀計猶未達游勤惠翰殊以慰荷
人安可不密前所申多後時且似道聽塗說耳金陵
戍兵必有紀律向諭及節制雖欲創行其實在境內

無不受命之理也忠勇軍民兵誠可用平時亦當有以
得其心也倪統制復官恐部中稽緩徑取旨施行其告
已遞往淮西帥司幸語之他續馳布

林沅州

埏

淳熙十三年

某竊以秋氣浸清共惟守邊暇裕台候萬福家學淵
源推以治民必著惠政過承緘啟告洗印之期不勝
欣感羅鬼中馬若非向日州郡妄覲功賞縱吳汝翼
引惹其來彼安能越軼生界涉吾之境是固無足慮
者惟沿邊蠻獠不一省民時有交爭而土丁刀弩手
名存實亡緩急無以備禦比則當為曲突徙薪防微

杜漸之計高明必有以處此餘冀若時珍愛以對褒
璽

趙克夫 淳熙十三年

某承諭極荷不鄙羅鬼距沅州甚遠隔以諸蠻非止
一族向因吳汝翼謂市馬可謀厚利多方誘引以來
一時守臣從而信之彼乃捐利逐族假方能叩邊既
杜絕之豈復再至近者恐是小人偶揚虛聲而邊吏
不容忽遽來告即諭以內無招引之人決難遠涉已
而果然大抵傳聞多失實如陳虎之類是也既荷忠
告輒此詳及

又 紹熙二年五月

某竭違風度日以馳情暑令正中共惟宣化名邦台
候倍擁繁祉下車浸久威愛交孚亦聞姦毗時欲結
集輒先事梗其喉牙消患冥：間千里受惠多矣今
連屢奏乞大有以存撫之乘此時相與細畫永久之
利不亦善乎故人子往赴上抗正備驅策其人廉謹
可教也餘非尺牘能盡惟冀以時保蕃對增秩賜金
之寵

趙揚州 子濛 淳熙十三年

某每勤教翰豈勝慰感王俊閻振有來耗否道聽塗

說鮮得要領不可不察也萬弩手與民兵異既免稅
役而事藝全無議者多以為言遂令州郡條具近方
申到止可在家閱習來春遣官按拍其詳並已劄下
又慮守令張皇追擾不則文具悠：因通諸郡書望
徧諭此意大抵法無不善行之有過與弗及耳偶病
目不及親染他續馳狀

又淳熙十三年

某竊以秋氣浸清共惟知府安撫龍圖少卿鎮臨有
裕台候動止萬福比嘗具狀為開藩慶茲蒙誨翰感
懌無已先德啟真王之封非特少慰孝心遂將傳芳

史冊茲聖朝盛典也末由面叙第切馳情願加保願
倚俟嚴召

某疊勤公劄謹悉巡邊恐動觀聽未見降下文字或
在三省耳楚州招淮北人亦嘗丁寧之令姪孫自可
徑權此與其他攝局不同尚何疑焉嚴先領武鋒比
未鎮如何強勇等軍兼付彈壓眾論允否並望批諭
修城更不覆實裁減一依初料又於漕司支椿管磚
并蘆蓆其餘錢米不過數千緡三司辦此有餘只是
聖意欲其堅久指揮甚詳望戒官屬勿視以為常程
乃善民兵萬弩手方類兩路守貳所陳審而後行庶

免文具併幸垂照

新永康倅李季章

璧

淳熙十三年

其遠辱長書貳以牋啟學博辭瞻玩味不能去手自
非天分人力兩得其至孰能臻此真可世其家而名
後世矣適日不審獲况何如舊物來歸諒深懼慙茲
雖未能大攄素蘊然以別駕奉親懽亦足養志多賀
多賀相望悠緬後會未期臨筆耿：願言為遠業珍
受

李季允

壘

淳熙十三年

某辱六月所惠書及啟一通詞源浩：發岷山而注

于海一日千里殆莫測其涯涘何其盛也即日所履何
似奉親著書當有以自樂曾俯就銓試否知縣通判俱
已得闕自可彈冠以昌遠業某數日乍衣綿目痛不能
親染惟冀厚愛

田提舉

渭

淳熙十四年

某特蒙寵惠新詩既歎才華且愧厚意浙東歲歉正賴
賑恤昨日有近臣奉諸暨縣強民三五十輩以投托質
借為名強割大戶姚縣丞趙十一趙七三官人家禾稻
白門鳩姓孫人義安鄉姓黃人數口皆以窮餓自縊此
月九日縣尉王尚達十二日府稅官吳松年各因被差

下鄉為村民三百餘人擗轎請驗田至擊轎兵毀從物
邑中閉糴人情洶：不知果否上已令豐儲倉撥米二
萬石往相助望稟帥參及繡斧同為區處幸甚因謝來
况併及此其餘夕即必能具布矣

張瀘州

志

淳熙十四年

某昨辱三月所惠書知修城畢工馬湖蠻帖：無事方
切欣慰茲蒙嗣問益佩愛予炎暑可畏共惟鎮臨有裕
台候倍膺繁祉蜀土狹人貧豈應更用刻深之士來諭
諄：不勝感服便民五事併切欽歎尚阻晤語臨風馳
情願言保固冲襟以需召節

某衰病不才久滯朝列毫髮亡補積愧素餐豈謂推排
遂聯宰席歇後之譏自猶知之况於輿情過蒙敦篤遠
貽緘啟詞義高古非所宜稱一味慙荷薄遽修謝殊草
草惟寬明容恕幸甚

某悚息拜問侯門仙聚緬想上下均福煮茶賦初緣淺
陋不能識前輩用筆意乃蒙寄示釋疑大篇發揮妙思
使其掛名公家詩集中一何幸與清虛四帖重煩宛轉
臺山舊事亦勤贊揚茲又幸之大者敢不重拜賜茶數
種并雙角龍團味初嚴而後甘却是真茶併以馳獻益
捨此無以當大手筆非為禮也

江西陸提舉洗 淳熙十四年

某比已具記茲再勤諭及度牒折米事蓋嘗劄下矣美惡難辨升斗多弊貴賤不等所以未容徑行今既先刷五萬緡起時收糴將來徐補還誠為得策不然分度牒與旱傷州郡仍約漕司多方那免是亦一說惟賞格未頒不可誤人其他區處必皆有緒大抵委土官僧道勝於胥吏若守令務為文具則非徒無益而又害之此最當在所察也

又

某前日已遣狀昨日乃聞江西度牒難賣州郡甚困科

擾今早已用臣僚奏劄收回却乞上供錢糴米急此布叙候到請一面拘收回司差兵役星夜解來封樁庫送納其他當別作措置行下幸垂照

鎮江張幾仲

淳熙十四年

某辱真翰不勝感慰光堯厭世臣庶哀摧公家世受異恩固應切攀髯之念乞配享奏狀已付出舊例集議然後降詔有如循王忠烈堯然首從霸府必為公論所推矣境內士人葛庚詩有陶謝風向求書詰當塗心許之而未果發會渠即世前守欲以官田潤其家未竟而召田丹徒備知曲折望試詢之或償掛劍之心耳

湖南趙提舉像之 淳熙十四年

其蒙誨諭衡州曲折亦備聞之直情徑行語言輕易非執事度量汪々豈能容恕如某輩平時屢被醜詆只得自省其過耳渠屢有請祠文字緣國哀未暇將上諸公欲與易地又念替期非遠迎送紛々所費不貲更俟少定商量先此復來况切幸台照

王瓊州 光祖 淳熙十四年十月

某辱八月所惠書具審鎮臨遠服台候勝常殊以慰感家傳小錄得窺承平制度何幸如之地圖併領東坡所謂四川環一島百洞蟠其中信矣便民五事皆確乎可

行第邇來重于改法例送後省及六部者詳鮮有施行徒費月日擬欲直取旨又恐將來太守非其人雖劍錢物而流弊自若如江鄉和買之類反貽患於無窮尚爾猶豫若及執事在官使疲晷少寬二年後人知所矜式其庶幾乎屬以國哀具復草々惟冀順令珍愛以俟褒

王順伯 淳熙十五年

某辱誨翰喜承別後涉履修塗台候寧嘉武昌回祿初見總領所申狀謂案牘被蕪深以為慮今得如此幸矣水災異常聞公安一縣皆已推盪而諸司畧不及之未

審果否振恤民隱計與諸司熟議矣遣使本圖裕民近
王卿申比前政增收七十餘萬緡向若稍寬州縣豈非
美事耶薄遽占復草率霜冷倍祈保愛

浙西羅春伯 淳熙十六年正月

某自聞召命念欲馳問而短才疲於應務竟爾未暇茲
勤誨牘感悚無已適日台候復何如大著力行所學悉
意賑恤使一道黎庶當歉歲而無流殍陰功陽報自應
入儀禁近况主知素厚人望攸歸者乎 吾言更不
切怛惟幾善愛以對天寵

祝汀州

樓

淳熙十六年

某辱七月所惠書喜審台候寧嘉揚斌已補進義校尉
其次者亦有名目帥司事干涉頗少但謹視盜賊毋令
復作可也補銀既免而天申歲貢又停所省必多尋常
便民事件皆付後省其肯省覽稀矣節制屯兵某向在
密院曾為江陰雷州畫昔遇捕盜則從權事已如故最
為良法若用此申請必從此不欲干預耳餘冀以時保
蓄冗甚草：為愧

李獻之侍郎

淳熙十六年

某竊以歲晏凝寒共惟某官領袖從班神明攸介台候
倍擁休祉更冀仰體方隆之眷加厚保調大用在適臨

風傾頌

某自頃手牘叙別之後每于今小坡問動靜竭從去國
聲迹遂無由相聞矣間審淵衷思賈亟頌召節儀曹鼇
禁金匱石室極儒先之榮遇不勝斯文之慶兩杜尚有
虛席意者已遂宣押遠方特未知耶日與士大夫共深
傾佇而已

某貪祿忘歸罪戾山積曲蒙聖主天覆地載俾得奉祠
鄉縣其僥倖甚未知所以報也杜門省誓不敢以姓名
入京都况侍從要路乎豈謂侍郎照肺腑之無他念金
蘭之惟舊乎書先達意爰有加厚民風而篤交情實閔

政體豈獨某拜嘉而懷感也未由面謝臨筆姑叙萬一
切幸台照

書稿卷第十三

終

書稿卷第十四

周益文忠公集一百九十九

劄子十一

葛楚轉輔樞密

紹興元年春

某竊以芳春妍淑化日舒長共惟樞密同知綏靖華夷
神天顯相鈞候動止萬福某家居得遂野性茫覆厚矣
遙睇門牆正阻承教臨風悵然敢乞加衛寢饋永弼興
運

某愚：違去鈞表遂將周歲道可尊國與衆人同一瞻
仰眷與素厚私心倍劇綢繆書牘缺然則以用舍正異
勢當爾耳高明無所不燭而又常善恕物得免于戾已

為厚幸走介而予之書此禮何敢當此意何敢忘也忽
忽叙謝莫究萬一敢幾垂察

某仰惟明公問學文章世濟其美至於德業之茂謙和
之至則又本於天資而加勉焉是宜上結主知下孚物
望自登政路忠言嘉謨表在人耳目麻案計已宣布值
國盛典崇晉崇秩益未敢多賀也

某任不知止顛沛固宜上賴聖主隆寬二府曲為道地
使得奉祠歸里一出十五年交游零落殆盡老病復疲
應接省譽之外困眠饑飯而已最是目力昏乏書冊盡
束高閣舊好遊山今復足力不强前輩云少年真可喜

老大百無益今方知為實錄每荷眷念輒具布之

張漕叔椿 紹熙元年

某日依河潤而未容曳裾賓閣此心日以馳騫春序浸
暄共惟使節光華台候駢臻多祐江西劇部漕輓之權
重於它路非獨財賦灌輸京師者多亦以士民繁夥凡
百倍費區處自匪真才豈能膺此遴選正恐朝望素隆
前已垂上禁塗矣又淹于外理必不然更祈保衛粹冲
即奉嚴召

某又欲致褰帷賀每見前輩閑廢中於時貴書問往
和而不敢唱此亦泥古不通之過旬日前迫不得已僭

具一紙方惧觸冒未知其達否而故人愛念有加先墜
華翰其為愧感豈易名言恩叙謝莫究悃悞尚幸澄
察

方吉州 崧卿 紹熙元年夏

某竊以暑氣尚清共惟知府朝議千騎載塗神物隨護
台候倍擁殊祉更幾保衛真粹道膺非常之寵

某拜違雖閱歲時而箋校尉韓文朝夕在目固無異親
薰而炙之也茲承出鎮大邦豈獨推上德而加之民固
將鄒魯其俗馴至于道既為斯文喜又持以自賀

某比審內出竹符畀付良二千石屬方掃軌荒郊謝絕

人事未獲輕為賀問徒與田父共歌來何莫而已敢謂
雅眷不遺墜况緘啟詞意高妙如泉源不擇地而出碩
某何足以當之又怯大巫雖欲視儀酬答含毫意 迄
莫措辭方擇子弟如泥卿侯者誦習中和宣布之詩庶
幾風化轉而上聞或助選表用以為報云

某仕不知止自貽顛沛歸伏里閭愧幸則多向緣前政
偶相牽聯每不自安今茲賢收涖止方修吉甫之相業
無陸九之嫌而有其歡抑又幸矣俟聞近音別布悃悞

丁提刑 逢 紹熙二年

某自頃復狀日欲嗣音而杜門不與便遇因循至此惟

是傾企實勞寸心茲奉誨牘愛予溢于翰墨感愧交集
炎暑喜承清風一道神物相勞台體駢臻多祐某衰老
幸安畎畝茅百病交攻畧無寧日福過理所當然不足
矜念晤言悠緬滋劇馳邈所願垂意衛生以需異寵
某載惟文章政術獨步斯世自結主知踰二十年正以
精明敏達所至興利除害奏課第一適當重外之時致
緩環賜今距成資僅三時亦既除代則螭陛鷗閣此去
恐煩踐歷矣振官府之委靡而不塞姦此衣食之原最
為上策如漢世繡斧逐捕抑末矣賢使者在彼夫復何
憂劉卿已到常德否老於帥節必能協心布宣德意尤

可喜也陳君舉所序佳篇朝夕玩味歎仰無已沅湘古
迹滿前按行餘暇計吟詠益富猶且不以己長絕物一
眄梁山惡語何其謙也三復來諭但深慚難

黃提舉

唐

紹熙二年

某竊以秋風生涼共惟提舉郎中奉使察州神明攸相
台候倍膺純嘏德望揚歷諸儒雅重近者侍從薦聞不
一而足召拜何疑更幾加意保蓄丕承天寵

某自南康人還上狀之後尋以瘡瘍大作起坐俱妨雖
審使車已抵臺治日與士民依賴澄清而未能一修尺
牘少伸贊喜負何言今想螭階入侍近在旦夕謹因

崇仁趙丞自此赴官扶憊占叙不敏惟台慈矜察幸甚
樓大防尚書 紹熙三年

某竊以秋煒致爽共惟某官玉立從班神明輔翼台候
起居萬福內外制遠追兩漢燕許常揚魯何足道君舉
到闕必真學士之除斯文幸甚晤言悠緬臨風悵望敢
祈為國珍練行展經綸之蘊

某連年抱病形體骨立中夏忽染沉疴絕而後蘇迄今
猶未復舊乃值重華遺弓號慕痛切生意盡矣特蒙誨
問三復感塞茲者天下事已定公卿協贊之力為多魯
公勲德方隆中外攸賴江海殘生知免矣四明書尚未
暇遣贈謚想有成說

某悚息拜問國太夫人欽想壽祉彌隆令弟奉議已遣
報潘君文字切望成就之毋使其失信於紫薇幸甚餘
具別幅

薛象先少卿 紹熙三年

某自聞以奉常造朝恩禮優異指期持橐雖竊為斯文
慶而未敢亟奉尺書內外之勢則然高明必亮其非簡
也臘近寒凝共惟雍容曲臺台候倍擁殊祉某乘障正
藉餘苾茅老病日侵倍費支吾開春即申祠請邈然晤
語更極馳情願保粹和不承寵渥

其悚息拜問慶門仙聚必已偕來定甚在坊頗安便否
少蓬想日相會於班列知其兼職勞於撰著不敢以書
恩之然極瞻仰尺書輒至門下益有少事永州乞加封
神祠具如別帑不無主張之望幸恕率易也

鄭舜舉侍郎 紹熙三年

某竊以上冬雨寒共惟宗正判部侍郎論思禁路台候
動止萬福某比具尺書劄稟世忠詞鄒浩事未審已蒙
施行否今又有湘潭縣郭五十一等情節具之公牘此
間地廣人貧村落竊盜習以為常數人共得二十餘千
若皆坐強劫傷主家而殺之實為可憫又不敢輒有縱

舍輒具奏乞降付秋官或殺或貸蓋本無害人之心頃
在朝路見強盜罪至死者案末必具次數及贓錢多少
斟酌取旨今次數既少贓錢又不滿五千故敢告之下
執事某已丐祠此書到日俞音必下但目前不容稽留
是以冒昧言之愧汗無已餘祈遵令衛生即登八坐

又

某比游以幅紙白事想達台聽茲審親膺簡擢修聘北
鄰玉節光華李揆不足道也歸正八座竊幸賜言之中
云鄒浩獄止是申省莫已施行所繫頗有利害蓋以中
國常法治之若止令編管來長沙乃善想陸對受國書

正忙不敢多幅

張君量提舉 紹熙三年

某近附憲車使人拜狀必闋清聽茲有少事冒言之清
湘揚照者廣西人頃在朝以其奮身遠方稍出其類頗
嘗延譽拘於初改官不能有所成也其後陳君舉在本
路論薦有任滿升擢之命今聞以民訟送營道不知其
事如何敢望一諭或可濶畧否修城本意以飛虎軍將
佐數人曾經版築頗知次第今皆老邁過數年則新進
者難責以此故欲及其在此為請於朝丐十數萬緡張
本今雖蒙恩曲從然工役浩大時月正寒方逐旋措置

甄灰度亦未易遽辦兼老病龍鍾開歲即再求歸昨乞
付之漕臺蓋為是也特勤台諭敢詳布之湖袁信皆大
天此亦時微有遺漏幸警備隨即撲滅衡陽多竹屋
尤宜照管也

章德茂侍郎 紹熙四年

某竊以東風解凍共惟知府安撫待制侍郎化行江漢
神物贊襄台候動止萬福某已具尺書致泰亨之慶重
勤雙啟甚非所安不敢重復講禮教語姑酬大况餘冀
滋厚保調嚮用繁祉

某密隣大府藉賴為多音驛時通又足自尉尉醞多且

昔每拜嘉未嘗不感愧于中魯酒愈不敢出蓋自知甚明耳元夕以大功服未除既有監司畧舉盃杓噉百千燈同一光之句以自解耳豫章增創山棚郡人呼舞歎服鉅公之手段又聞連日登滕閣劇飲殊不畏風蓋福人然後可以與民同樂耳頃平父二十一日啟行嘗云侍郎欲見芟堂始末謹以封呈全無文理忽忽又不及裝褫若近思記則豈容輕易所以蓄縮未敢錄去然決不敢食言也

徐永州

棟

紹熙四年

某近扶僊復狀想已達聽日俟祠報它無足言惟一事

前畧布之而未詳左右與武岡爭承甚急正謂力不足也今修路種木砌祁陽石橋蓋候館置溷軒百役並興當田疇闕雨之時不留錢穀以備振恤而委之土木冀後來虛名人不謂然萬一流聞于朝武岡之辭直矣速已之為善如種木最為徒然勞民費財隨即壞矣素荷愛予有聞不告非忠也未知能相亮否病勸草：

諸府

紹熙四年

某仰惟公府尊嚴不當頻以寒溫之語上瀆鈞聽茲有悃幅敢言之其向蒙恩守郡但期滿歲即復丐免是時亦止謂年齒遲暮才力弗強難久當繁劇耳身則未甚

病也自今夏以來嗽疾大作幾至委頓調理未愈尋苦
腹疾百藥俱試效驗茫然形骸瘦悴心志零落衆所共
觀非敢飾說昨伸祠請尚闕俞音尋得朝士書令少緩
再請是以累月未敢有言今賴鈞芘已及成資去七十
僅一年縱使掛冠已是稽晏况乃強扶衰憊日對民吏
內愧心顏外積曠戾雖欲自己力豈能勝已具奏并申
尚書備陳此意不敢便求休致且乞授以宮祠伏望某
官念其出入門墻之久矜其老病事勢之迫即賜啟擬
俾遂所請丘山大惠何日忘之冒昧控祈戰懼俟罪仰
乞鈞照

常德府袁機仲

紹熙四年

某竊以歲事將新冰霜凝沍共惟某官道洽政治神天
交相台候動止萬福某束裝欲歸為日已久得省劄即
啟行適天寒非病軀所宜拙恙愈甚方次醴陵尚需半
月乃可到家臨行冗甚不辦專介嘗以書附莊簽判叙
別未審無濡滯否愈遠麾幢臨風依悵願言厚加保愛
即符泰內

某已去郡不暇修元正之間特蒙委况翰墨感刻難名
易傳說解義序河圖洛書說皆本之經旨以破諸儒好
異之弊嘗一嚮可知其味所恨淺學寡聞莫窺要妙尚

侯他日請教元晦恐須一來魯衛之政夾湖而治甚休
益之相聚可喜前亦附數字今未暇再也

揚子直秘書 慶元二年

某竊以中秋澄爽共惟知府秘書千騎辦嚴神物隨護
台候起居萬福天氣日益涼冷調攝為先尚祈如意膳
服以備需褒表

某自別德容老病侵陵尺書間濶昨承優游麟省姓名
不欲輒入帝城暨聆出牧又未敢亟為賀問迹涉簡怠
心固不爾高明燭物必能察而恕之不然安所逃罪也
耶

某比聞對揚稱愜謂膺進擢而力求治民以考功竊計
郡國望召父之臨者非一而未忘舊治欲續前功上不
能奪竟為十萬戶之福士類無不欣詠父老至於鼓舞
某老病杜門已踰一年雖不能自同於負弩之令然不
覺曲踊之三勵也

某連年災疾畧無十日清安納祿蓋非獲已恩踰已幸
又叨進秩屬告命未至尚稽叙謝雙緘道舊意遠辭達
久無此作如獲拱寶榮感無已

某心氣不寧荒廢筆研假手非禮輒用手牘見恭敬之
實惟台慈加亮幸甚

又慶元六年

某悚息拜啟某官相望非遠音驛幸未至甚踈要不若時奉言笑之為慰也歲事將新共惟賢業浸亨對時受祉百順來備王春度玉墀不勝鄙人拳拳之祝著書樂道為况當日佳前輩間居作無限工夫正為不以應酬空過歲月耳某屢欲走介敬承起居因循至今愧不可言卜居竟如何古云求田問舍蓋先後之序若且以俸餘市良田而損數千暫為賃居計則所費不多他時食米有羨徐求一區似未晚也迂濶之見未審然否正寒萬：保重不宣

王南強提舉

慶元二年

某竊以氣序嚴凝共惟提舉吏部奉使察州神人交相台候萬福學該流略名冠倫魁已游承明著作之庭脩注演綸歷階可至更冀珍調寢膳即對嚴召

某比審臨遣大庭廉按江右委寄隆重過於閨臺往者莆陽鄭公常以龍首持龍節今茲調燮辰階吏民甚以為寵繼之者若非執事而誰大用可卜矣某幸預部民日望行邸爭先睹之快云

又

某又違風度企仰為勞自審光臨臺治盍以姓名自通

又念已掛衣冠杜門養疾人事俱廢蓄縮而止敢圖大雅好謙惠顧一日之雅屈大手筆形於牋翰與共俱尊百年三老之對妙絕動宮牆而非某所敢當也欲裁教語為報非特怯大巫而閣筆亦懼非野老事部使者之體不然來而不往豈應自抵失禮之罪手續叙謝莫究萬一向幸台察

沈持要詹事

慶元六年

某竊以季春暄和共惟致政待制詹事年德俱尊天人顯相台候起居萬福江浙相望邈然無晤語之期遡風伏帟倍切馳想所冀保固冲和益永喬松之壽

某別德久矣晝勤思詠夜形夢寐良非虛語剽聞視聽聰明步履輕快如五十許人蓋以蘊蓄經綸急流勇退康寧以燕其晚亦施報之理也屢欲拜狀而目昏力乏艱於揮染竟煩誨墨先之高誼不遺感嘆無已憑書叙謝莫究拳：

某平昔叨踰過分加之衰病嬰纏久合退休然猶遷延以俟年至復忝恩遷有愧高風多矣只今僅能眠食每思向來石田之諭輒復效顰此外百事俱廢竊計讀此為發大笑也

陳安行給事

慶元六年

某比審年兄以輔藩高第擢帥七閩蓋今重鎮無如長樂易守教矣必俟德望福力如年兄者乃可稱此况莆田故鄉近在巡管書繡甚寵他時大用亦當踵陳梁二公矣某素知彼間風物甚美直為荔枝一行亦自不惡凡三得符節皆垂赴而易至今尚形夢想也偶林教授自此代歸年兄必詢賤迹不可無書其人自佳士當蒙一盼張倅在彼往來之便必多別當嗣記

馬容州

嘉泰元年

某自違台範雖卷企詠而道遠無便尺書莫致方茲愧悚忽枉華翰欣審台候起居萬福使治乃五筦之一

寄委甚重下車已周歲振舉紀綱撫摩凋瘵千里當被實惠多賀多賀長牋遠暨倍荷眷與錄示利便劄子既行不應復輟林僉判能達民隱亦自可敬白皮場竟如何某年垂八十掛冠七載豈料狂生輒及其姓名致煩公論聖恩祇從降秩真天地之施也王季海同僚時初無他左右所目擊徒知自訟而已方此省讐占復草率惟幾順令願養亟須召節

書稿卷第十四

終

書藁卷第十五

周益文忠公集二百

小簡

賀湯左相 紹興二十九年

即日踐長觀復陰剝陽生恭惟佐王以道格天以德庇
 民以仁九重眷之百神衛之夷夏詠歌之鈞候動止萬
 福冰霜方凜益乞崇護苗鼎以永無窮之聞寸心拳
 專以是禱

某竊謂受知者必圖報稱之方効勤者必假竿牘之禮
 在歲辛未相公以北門學士詳定殿幕而其實出衡鑿
 之下越丁丑春棲遲銓部驟蒙畀職泮水既又面語赴

上之期受門下恩亦不後於衆人矣顧身賤地遠未嘗有絲髮之報猶當朝夕奏記少效其勤而自違去黃閣閱十六甲子姓名至典籤者財三數焉豈惟無以効勤且將用怠慢獲罪雖然安敢無說以處此晉人有貽書等輩者慮有謬誤開閉數四卒達空函何者內重故也况以州縣之小吏仰望天子之元宰分守嚴於外兢懼交於內日事竿牘果能保其不謬誤乎連意含辭將作復輟理亦宜也不然雖甚無知寧愛方寸紙而自投怠慢之誅乎相公曲盡物情必有以得之

某恭聞九月甲午制以相公正位元宰蓋功大者位愈

尊眷厚者任益專昔伊尹仲虺同相成湯矣而成有一德獨美於阿衡周公召公嘗分左右矣而師保萬民不歸之君奭下逮周勃有功漢世為丞相位第一陳平功次於勃為丞相位第二遠攷伊周近觀平勃即其位叙而勲德眷任之輕重見矣然則相公今日之拜其勲德殊絕眷任隆厚何待匹夫之言為國家慶為天下賀可也

某觀傳說復高宗曰惟說式克欽承旁招俊乂列子庶位美哉言乎真輔相之事業也自唐以來大臣不能公聽博採而以好惡汨其心知賢矣或以踈我棄之知不

肖矣或以與我收之牛李紛、迭相排根夫豈知秉均
當軸期為國得人而已何至容心爾耶自相公為政首
以人才為念或取之耆舊或拔之徒中蓋有味平生而
不相聞者矣特以公議所在信用之不疑耳異時二府
纔擬一官世必曰某之昵也某所授致也今則異於是
曰彼以德進耳彼以言揚事選耳自非融好惡之私而
盡旁招之義何以臻此夫相公事業多矣某釋彼不言
而獨贊用人之美者蓋以深得傳說之心而可為萬世
法故也是敢表而出之

某聞士未達而求知亦難矣商立開年老力弱衣冠不
檢自取欺詔於子華之門向非泳河得珠蹈火取錦則
何以豫肉食衣帛之次乎毛遂事平原君三年左右未
有所稱誦平原亦未有所聞也向非按劍歷階則雖末
立見徒虛語耳嗟夫泳河蹈火行怪而不可訓按劍歷
階履險而不足法施於戰國則可治世奚取焉今相公
以權衡水鑑運量天下而照知其情偽使賢者殫其知
能者竭其力文字法理各以才進固不徒履險行恠而
後用也獨某一介之技為甚短九品之位為甚卑望墻
仞千里為甚遠日月逝矣求知之說安在采封采菲衛
詩有之願借是以為請無德不報周詩有之願託此以

自誓惟相公念焉

某聞之時未當進而進失之躁時可進而不進失之緩
其顯愚晚學叨蒙恩紀司桐子於秦淮之上有奉入餽
其口無牒詐裝其懷杜門掃軌感戴造化之餘願常取
易讀之竊有見焉晉之初六處卦之始功業未著雖直
離照人所未信則必摧如而居順寬裕以無咎然後不
失之躁焉豫之六三居下體之極去由豫特一間耳倘
或睢盱不進遲：致悔無乃失之緩乎某屬者侯罪于
茲雖不得晨掃齊門晝登孫閣然未嘗飾說以干進者
懼夫躁也今既成資矣去德之日久踈履之心切苟不
竭誠自歸則亦可謂緩矣於是佩弦以自警削牘以乞
憐願相公垂情而收拾之毋使其誤注周易也

繳書劄子

其一違鈞表三易歲華雖戴恩之心甚勤而奏記之禮
不敷蓋深虞於犯分非自怠於歸誠今者竦聽制麻寵
褒勲德峻升上相獨冠百僚宰柄不移師瞻愈赫其名
慚小醜實點大鈞仰睇龍門未有躋攀之路崇成燕廈
豈無欣躍之私用竭寸心虔修尺牘意凡詞俚紙弊墨
渝繾綣之情未伸借煩之罪已積伏望僕射相公擴涵
容之鉅德諒依向之小勤間於政機賜以鈞覽雖大呂

黃鍾之府憂釜竈以非宜然潢汙蘊藻之誠羞王公而
或可瀆尊之譴伏地以頌

賀孟宗丞除江東運判 紹興二十九年

謹時之問右幅具陳即日共惟新節載頒恩章甚寵神
物顯相台候動止萬福敢洎以手啟申詞固知煩瀆亦
卷之之意也

某雖名晚學嘗竊聽人物之評矣才學如執事操履政
術如執事在漢廷中無出其右者蓋願執鞭而未得也
今承馳傳鼎來望見有日懽悰所激形于言者萬分一
耳

某伏審以天子之命移按鄰封雖足國富人均為劇寄
然江表為當今甸服視兩淮畀付加重矣其將繇此祇
嚴召筮從班乎近比然照眾所共悉謂某為屬於斯而
求媚者非知言者也

某竊謂足食理財在禹疇周官皆為急務其本末源流
可攷也而後世乃以高功利析秋毫為能民始告病矣
國家分道置臺每擇仁賢而信之蓋得先王裕民之本
意彼洪羊晏翼之徒所得幾何宜執事之所唾罵也自
儀真抵臺城一昔可至然公行勿遲者江東父老之謠
也公無遽歸者淮人攀轅之志也泮宮小吏不知其他

方時隆寒三祝輔茵鼎禦冰霜而已
某修身學文皆出人下二年于此一善無聞今遇大君子按臨在適豈特役、隨人甘心於自棄之域哉砥行立名附青雲而施後世舍執事其誰望之某皇恐敢言之

謝李提點薦舉 紹興二十九年

承訶疊具右幅即日共惟使駟所臨人神參衛台候動止萬福寒色未解更乞為國保調以對光華之寵

伏自繡斧換臺忽、累月雖千里相望不得日瞻星表然孤根蕞爾猶在春風中豈以地遙而忘依向惟節下

念之

竊惟九府園法國家之利源也復司之初遴擇儒術心計之兼精者而節下首當之委寄可謂重矣願德望久著於仕塗姓名寓直於延閣重以潛藩之眷寧容徘徊於外耶逍遙供奉班真旦莫事耳

某顛蒙羈賤無所取材日蒙比數而收之此意厚矣古者一飯之惠未之敢忘况辱薦揚寧不感刻占詞道謝特世俗常禮若乃臨事以正潤身以德願持此為知己之報節下亦將有取焉

乃者急足言旋正以病餘僅獲附尺牘是後絕無便順

可叙區：至於專介以行又非寒廳所能辦今因洪幹
還新安輒以緘啟記至能轉達然亦晚矣大雅豈弟盡
人之情倘賜通亮幸甚

賀王知院 紹興三十年正月七日

即日恭惟機幄靖深日籌大計人神交衛鈞候動止萬
福春淺尚有寒色所冀益護鼎食輔成安彊頌禱之誠
於是為切

某觀韓愈之于李絳辭去纔旬朔已有兒女子之感致
和宣滯之祝丁寧至於再三夫愈何取于絳而拳：如
是耶蓋古人一蒙知待輒力圖報効勢或未能則念：

不忘情見乎辭是乃近厚之一端也先生盛德偉譽方
雍容西府為四海所注想豈絳敢望而某受恩深厚不
止而愈所蒙顧念一去師門屢更旬朔具瞻之悵雖與
眾均戀慕之私則有不能自己者羈單疵賤既未獲少
酬恩紀敢假愛玉體享黃髮之詩三致志焉雖知煩瀆
亦拳：之意也

伏觀辛未制書寵褒舊德越進元樞得位得時眷任彌
重却音初播士論翕然咸謂朝廷有柱石之隆海宇有
泰山之勢豈特淮南謀寢晉國盜奔而已欽想正衙入
謝之後冠蓋雲集某馳心賀慶而三萬里弱水未可以

涉恍同夢蝶栩東閣不知身滯周南也

某竊謂自昔大臣誰無致君澤民之心然勲業名譽多
泯沒無聞者蓋由不以人材為意故也朝進一言欲興
天下之利暮進一言欲除天下之害利未必興害未必
除膠：擾：徒多事耳於此有要道焉為一郡一邑得
人則郡邑受賜為一路得人則一路受賜推而上之百
司庶府亦莫不然比夫紛更法令務為文具者蓋相萬
也先生自居從列已汲：以引類為意既登二府攷：
益甚今內而臺閣外而牧伯下逮御軍之將乘障之吏
皆以稱職聞彼搢紳諸儒第見先生勲業之盛名譽之

美而不知所以致此者蓋有道也古者進賢受上賞先
生亦既履三旌之位矣揚善宜有後行慶芝蘭茂盛於
庭階也

某聞伯樂過冀北過馬輒取之無留良焉非貪多而務
得也蓋伯樂天下之善相馬者使其為駑駘則不必一
眴既一眴而又捨之人其以為棄物而不復顧矣先生
之門士大夫之冀北也某雖凡才亦嘗辱在品題人皆
知之然且置而不問三年于此天寒遠放鴈為伴日暮
肉生烏啄瘡若非先生賜以終惠則何人之廐可効其
長鳴乎伏惟不替前日一盼之寵少加憐焉

賀邢倅 紹興三十年

即日共惟歷吉辦嚴百神隨護台候動止萬福初暑當以調護為先願慎茵鼎副卷之禱

某稔詞華于播紳採風謠于江浙雖未識荊州而慕慕公子則久矣効官泮水聞有以瀛州學士來貳藩條者問諸府僚蓋執事也退而喜甚亟占詞為賀且致願見之誠如此惟高明裁幸

承被詔黃來乘泥軾選掄既重委寄可知異時別京如洛邑睢陽大名皆置副尹以為儲才之地惟今秣陵蓋其比也君侯新安之政去思猶在復勤此來非惟詳試

術畧亦使江東父老知朝廷既以賢牧臨之又以英才貳之用示眷顧不忘之意尚幾適征式從民望

自闕下抵此數百里而近聞欲泛鷁北來想遂理柁矣夏潦漲渠乘風揚帆決無濡滯吏民詘指計日以爭快睹第恐禁圍需賢中道奉趣歸之詔耳

某空疎庸懦未辨根銀荷造物憐其困窮使埃罪于茲行三月矣今將仰依蔭樾苟迹瘳曠幸甚過望不可言也區區情悃尚容面稟

賀都總領紹興三十年

謹時申問右幅具之即日共惟濡轡載塗百神隨護台

候動止萬福瞻侍非遠敢重以保調為請不宣
其一介么麼願在下風之日久矣茲聞馳傳鼎來大將
小校皆怕首鞞袴鞬弓插矢以俟迺勞其亦將躬率諸
生帶櫛具劔儼然造焉既欲拜北平於馬前且幸寓日
盛禮也

其伏承以尚書郎授使者節置臺於江淮衝要之地贊
書一出輿論翕然今雖大昭掛壁不以足展木牛流馬
驪駕車之妙然萬竈仰哺尚資心計佇聞屯田金城積
粟振武漸省度支之費非特士飽馬騰而已

國家於江浙蜀漢之區分命名臣典令糧餉其任重矣
比者復詔涖職二年即優加進擢繇是結軌歸報者登
禁路如歷階然况明公踐揚既久聲望隱：豹尾之中
鳳池之上自可徑躋而躡至似又不必以歲月計也
春陽駘蕩周道倭遲不審前驅今次何地經從北固三
組垂要鄉閭父老願觀車騎過家上冢之盛或小作淹
留耳更冀迺征副軍民之引領也

其棟踈駕緩克負泮水操行不足悅衆學術不足帥人
類諸大夫憐其無能而茆存之再書下：考矣明公戾
止尊賢而容衆雖不敢望解榻庶幾宇蔭有所依也幸
甚幸甚

前柳州徐郎中 璉 淳熙

某頓首再拜上啟知府郎中台座秋氣清肅共惟燕處
雍容召用有日台候動止萬福更冀調適寢味益介新
祉來服寵命不宣

某頓首再拜又啟乃者敷造仙里差池瞻覲區區仰德
實勞寸心日佇來朝冀敷教益臨筆不勝拳

某頓首再拜又啟載惟某官以才猷望實濟先世之美
分符名郡政譽藹然自此入儀華貫蓋必然之理區區
賀悃容面以致

某皇恐再拜某衰病不才寓直鼇禁已為踰分恩加真

拜豈所宜然方圖叙謝先辱雙緘之貺禮意謙勤何以
克當忽：治報大愧率略加亮幸甚

洋州王通判

某頓首拜啟通判朝儀年兄執事杪秋霜冷共惟協贊
名邦神明所相台候萬福更幾順序珍畜別俟召擢不
宣

某頓首拜比幸承教既別不勝瞻仰今春辱去冬所惠
書貳以長牋詞采高妙三復歎服來使留此甚矣拜答
稽緩且職事冗冗不能賤儀以報愧忤無已尚惟高明
有以加亮幸甚

其悚息再拜年兄文學政事加人數等萬言投匭仰當
聖心尚淹別乘未究閎蘊意者坡公園亭竒作正須大
手繼之併為洋川盛事耶不然入儀要路乃必至之理
何遲也

其悚息再拜其哀病非才塵點班序為日滋久罪戾增
積不緣罪去則當引分歸耕矣別希之諭謹悉西樞主
盟蜀士應誦周南之滯如某吹送無力空負愧耳

劉仲至尚書

淳熙八年

其頓首再拜上啟知府安撫顯學尚書台座季春暄淑
共惟祭戟肇臨神人交相台候動止萬福更冀順乘月

律珍御帛衣以俟嚴召不宣

其頓首再拜又啟坐遠台光歲華八易慕仰風味未嘗
少忘日僕來歸庶遂晤語未間更劇馳遡

其皇恐再拜又啟共承光膺簡擢就畀帥權增重潛藩
大孚輿論尚書德望揚歷為時名臣忠信慈惠如古循
吏穎川入相行見於今非為諂也

其皇恐再拜又啟其昨僅能一紙酬來况方伺開藩別
修殘敬因循不敏又蒙以緘牘先之既慙且感言莫能
喻尚乞矜恕

史直翁丞相

淳熙十年

某頓首再拜上覆致政太保公相鈞座伸詞恪具公式
霜寒甚力共惟心逸日休神天似助鈞候動止萬福謹
以副啟仰瀆記府伏乞省察不宣

某頓首再拜又覆久違道德之誨心旌搖：曾不少休
每見四明士大夫備聞居閑成趣視履益康著書論文
把盞行樂雖精練少年有所不逮未嘗不以繫官于朝
阻待杖履為恨也茲承赴闕在即將復為賜第客此為
欣幸豈有窮已百懷敬需面稟

某頓首再拜又覆共審抗章待謝備極優賢之禮蓋三
公就第久無其人年至未衰古亦鮮儂天生聖主必就
至平之業則太公亮武王潞公佐元祐當有所屬此某
所以既賀明公今日名遂身退而猶冀功崇業廣于異
時也

某頓首再拜又覆某近者雖酬鈞翰當隨具公啟為門
下慶伏蒙謙德異甚首枉公函內循不敏寘愧無所然
周公不之魯實區：所期望者與其諄：簡札間孰若
面致其喜之為勤也以是又復缺然未即具報今果聞
奎畫誕頌趣公入謝矣此非臆度蓋合輿言不然豈不
知逋慢傲忽自敵以下非敢施其敢用於事貴事長
乎

靜江啓帥體仁 淳熙十年

某頓首再拜上啟某官年兄台座寒色方凝共惟坐鎮南交神明欽相台候動止萬福更冀如意保攝益綏純嘏以俟來歸之命不宣

某頓首再拜又啟間潤不勝瞻仰尺書雖足伸詞願豈若承顏接詞之為快也雪片梅花今其時矣鈴齋燕暇賓朋參集其樂豈有涯哉臨風不勝馳詠

某頓首再拜又啟共審消剛洗印大開幕府前日澄清休譽猶在士民之耳目今又以持橐貴臣總十連之重其風聲威望蓋有加矣江氛嶺祲轉而為和氣遠部何

其幸耶益法流通遠歸可待上意必不先一道後天下聊預言之

某頓首再拜又啟特蒙雙緘盛禮雖佩謙眷如愧悚何占賀率畧惟台慈有以亮之為幸

洪景廬舍人 淳熙十一年

某頓首再拜上啟知府待制舍人台座天氣晴和共惟政令已孚坐觀多暇台候動止萬福更冀若時珍衛延舍新社以對寵召不宣

某頓首再拜又啟垂隔多年慕仰德誼非如他人之泛泛也自承開藩股肱郡音郵頻至其慰幸已不勝言若

遂聞入覲朝夕晤語其喜又當如何耶
某頓首再拜又啓共審次對西清榮拜綸命諒深懽愜
觀聖上所以倚注與夫播紳所以期待不相不止曾是
晉選固未敢多賀也

某惶恐再拜伏蒙墜况雙緘禮意腆綈三復豈勝欣感
惟是占復率常簡畧迹涉于傲亦惟高明燭物諒其應
酬鮮暇因恃以不恐耳

某惶恐僭易上問台閣眷集欽想長幼均康有委切幸
垂戒

程泰之尚書

淳熙十三年

某頓首再拜上啟某官年兄台座深秋氣肅共惟惠霽
霑濡政平訟理台候動止集福更幾珍衛寢餼丕延天
祉垂副忱禱不宣

某悚息再拜又啟適者雖以一再見為幸而所欲言者
殊未究也別後更切企仰傾耳賜環冀得款集正恐公
入戎出如相避耳

某悚息再拜又啟共審消辰洗印敷上德於千里諒
惟碩德宿望屢考民功大用猶稽播紳日切延跂安
有天心乃眷輿論攸屬而容久外者乎趣舍人裝可
也

某悚息再拜又啟前忽：僅一再往手書公函厚禮遂
緩修致安敢文過恃宏度以不忍耳孫正之鄭人也為
邑值水災課不至殿否葉箋似敏健與之有契曾與顛
兄同僚二人者皆求書於千騎未至之前冀幸公此今
輒及之皇恐皇恐

某皇恐拜問隨軒眷集緬想上下均祉判院想已到任
知丞嘗一見也有委願聞之

蔣婺州

繼周

淳熙十四年

某頓首再拜上啟某官秋暑未艾共惟開藩有淑神
人欣相台候動止萬福某謹此以謝先辱敢幸省察

不宣

某頓首再拜又啟屬者一再復狀幸徹宗覽翹首鈴閣
會晤無階伏紙遡風馳系良極所冀珍調寢饋大用可
拱而俟也

某頓首再拜又啟茲承涓剛洗印條教一新諒深懽慶
載惟忠嘉鯁挺簡在宸扆固當問于兩社試望之於馮
翊意則可知來歸何待暮月不勝延企

某頓首再拜又啟伏蒙謙撫墜况公牘眷愛勤厚三復
感悚治境後來得雨否此間亢旱異常憂愧熏心具報
不能如儀高明垂亮為幸

某僭易拜問太夫人敬想壽祉增崇稍涼當遂迎侍眷
集翁受寵禧有委願聞之

王謙仲江陵帥 紹熙四年

某皇恐頓首拜啟某官鈞座上冬晴寒共惟鎮臨有淑
憂願頓寬神明掖扶鈞候動止萬更^福莫珍調鼎食即登
宰路丕究經綸之業不宣

某皇恐頓首拜啟久違鈞範仰德增勤雖間奉往來
之問而旌麾在望晤語邈然此心拳拳何翅繫馬而
止耶

某皇恐頓首拜啟共審弄印謀帥綏靖南紀無有當
上意者獨惟宗工鉅儒文武知畧前無古人後絕倫
輩是膺推轂大尉僉言撰良開府諒深懽慶然先一
路後天下輕重之間猶軫宸慮趣召在邇茲未敢多
賀云

某皇恐頓首拜啟某密依鈞芘自合伺候視篆亟與四
鄰共致慶問而病悴經時疲乏殊甚且迫替欲去遂成
簡怠特蒙遣騎委况盛禮在謙德固為有光內循不敏
何以逃相鼠之刺尚惟鈞慈有以矜亮幸甚

朱元晦潭帥 紹熙五年

某頓首再拜啟某官台座候問已具公式秋暑正祥共

惟綏靖軍民神天所相台候動止康裕更祈順令珍蓄
以需寵召不宣

某頓首再拜啓久違台範詠德為勞雖音驛時通願豈
若款奉名理之為快高山仰止倍極拳

某頓首再拜啓茲審撰良洗印寬上顧憂非獨一道
吏士敬服威惠而蠻獠種落莫不安巢穴而奉教令
得人之效如此宜公宜卿豈應久勞于外毋為暖席
計可也

某惶恐再拜某猥以妄庸頻年典郡積為謬戾念之
赧顏今得大賢揜覆瑕疵振起敝壞公利兩利豈獨

一夫屬卧病未能敬修緘啟乃勤盛禮先之滋以愧感
欲叙悃幅更慚拙訥惟台慈恕亮為幸

書稿卷第十五 終



